

ओं नमः परमात्मने, श्री महागणपतये नमः,
श्री गुरुभ्यो नमः, हरिः ओं

कृष्ण यजुर्वेदीय तैत्तिरीय संहिता पद पाठः (वाक्य सहित)

चतुर्थकाण्डे प्रथमः प्रश्नः

Notes:

- Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
- Please download our vedic compilations from our web site www.vedavms.in

Table of Contents

4 कृष्ण यजुर्वेदीय तैत्तिरीय संहितायां पद पाठे चतुर्थं काण्डं	3
4.1 चतुर्थकाण्डे प्रथमः प्रश्नः– अग्निचित्यङ्ग मन्त्रपाठाभिधानं	3

ओं नमः परमात्मने, श्री महागणपतये नमः,

श्री गुरुभ्यो नमः , हरिः ओं

4 कृष्ण यजुर्वेदीय तैत्तिरीय संहितायां पद पाठे चतुर्थ काण्डं

4.1 चतुर्थकाण्डे प्रथमः प्रश्नः– अग्निचित्यङ्ग मन्त्रपाठाभिधानं

TS 4.1.1.1

यु॒ञ्जानः॑ प्र॒थमं॑ मन॒स्तत्वा॑य सवि॒ता धि॑यः ।

अ॒ग्निं ज्योति॑र्नि॒चाय्य॑ पृथि॒व्या अ॒द्ध्या ऽभ॑रत् ॥

यु॒क्त्वाय॑ मन॒सा दे॒वान्त् सु॒वर्य॑तो धि॒या दि॒वं ।

बृ॒हज्ज्योतिः॑ करि॒ष्यतः॑ सवि॒ता प्र॑सुवाति॒ तान् ॥

यु॒क्तेन॑ मन॒सा व॒यं दे॒वस्य॑ सवि॒तुः स॒वे ।

सु॒वर्गे॑याय॒ शक्त्यै॑ ॥

यु॒ञ्जते॑ मन॒ उत॑ यु॒ञ्जते॑ धि॒यो वि॒प्रा वि॒प्रस्य॑ बृ॒हतो॑ वि॒पश्चितः॑ ।

वि हो॒त्रा द॒धे व॒युना॑ वि॒देक॑ इन् – [] 1

TS 4.1.1.1 - Padam

यु॒ञ्जानः॑ । प्र॒थ॒मम् । मनः॑ । त॒त्वाय॑ । स॒वि॒ता । धि॒यः॑ ॥ अ॒ग्नि॒म् ।
ज्योतिः॑ । नि॒चा॒य्येति॑ नि – चा॒य्य । पृ॒थि॒व्याः । अधि॑ । ए॒ति ।
अ॒भ॒रत् ॥ यु॒क्त्वाय॑ । मन॑सा । दे॒वान् । सु॒वः । य॒तः । धि॒या ।
दि॒वम् ॥ बृ॒हत् । ज्योतिः॑ । क॒रि॒ष्य॒तः । स॒वि॒ता । प्रेति॑ । सु॒वा॒ति ।
ता॒न् ॥ यु॒क्तेन॑ । मन॑सा । व॒यम् । दे॒वस्य॑ । स॒वि॒तुः । स॒वे ॥
सु॒व॒र्गेया॒येति॑ सु॒वः – गे॒याय॑ । श॒क्त्यै॑ ॥ यु॒ञ्ज॒ते॑ । मनः॑ । उ॒त ।
यु॒ञ्ज॒ते॑ । धि॒यः॑ । वि॒प्राः॑ । वि॒प्र॒स्य । बृ॒ह॒तः । वि॒प॒श्चि॒तः ॥ वी॒ति ।
हो॒त्राः॑ । द॒धे । व॒यु॒ना॒वि॒दि॒ति॑ व॒यु॒न – वि॒त् । ए॒कः । इ॒त् । 1 (50)

TS 4.1.1.2

म॒ही दे॒वस्य॑ स॒वि॒तुः॑ परि॒ष्टु॒तिः ॥
यु॒जे वां॑ ब्र॒ह्म पू॒र्व्यं नमो॑भि॒र्वि श॒लोका॑ य॒न्ति प॒थ्ये॒व सू॒राः॑ ।
शृ॒ण्व॒न्ति वि॒श्वे अ॒मृत॑स्य पु॒त्रा आ ये॑ धा॒मानि॑ दि॒व्यानि॑ त॒स्थुः ॥
यस्य॑ प्र॒याण॑म॒न्व॒न्य इ॒द्युर्दे॒वा दे॒वस्य॑ म॒हि॒मान॑म॒र्च॒तः ।

यः पार्थि॑वानि वि॒ममे॑ स ए॒त॒शो॑ र॒जा॒सि॑ दे॒वः स॒वि॒ता म॒हि॒त्व॒ना ॥
दे॒व स॒वि॒तः प्र॒सुव॑ य॒ज्ञं प्र॒सुव॑ – [] 2

TS 4.1.1.2 - Padam

म॒ही । दे॒वस्य॑ । स॒वि॒तुः । परि॑ष्टुतिरिति परि॑-स्तुतिः ॥ यु॒जे । वा॒म् ।
ब्र॒ह्म । पू॒र्व्यम् । नमो॑भिरिति नमः॑ – भिः॑ । वी॒ति । श्लो॒काः ।
य॒न्ति । प॒थ्या॑ । इ॒व । सू॒राः ॥ शृ॒ण्वन्ति॑ । वि॒श्वे॑ । अ॒मृत॑स्य । पु॒त्राः ।
ए॒ति । ये । धा॒मानि॑ । दि॒व्यानि॑ । त॒स्थुः ॥ यस्य॑ । प्र॒याण॑मिति
प्र – या॒नम् । अ॒न्विति॑ । अ॒न्ये । इ॒त् । य॒युः । दे॒वाः । दे॒वस्य॑ ।
म॒हि॒मा॒नम् । अ॒र्च॒तः ॥ यः । पार्थि॑वानि । वि॒मम॑ इति वि – ममे॑ ।
सः । ए॒त॒शः । र॒जा॒सि॑ । दे॒वः । स॒वि॒ता । म॒हि॒त्व॒नेति॑ म॒हि॒त्व॒ना ॥
दे॒व । स॒वि॒तः । प्रेति॑ । सु॒व । य॒ज्ञम् । प्रेति॑ । सु॒व । 2 (50)

TS 4.1.1.3

य॒ज्ञप॑तिं भ॒गाय॑ दि॒व्यो ग॑न्धर्वः ।
के॒त॒पूः के॒त॒न्नः पु॑नातु वा॒चस्प॑तिर्वा॒चम॑द्य स्व॒दाति॑ नः ॥

इ॒मं नो॑ दे॒व स॒वित॑र्य॒ज्ञं प्र॑सु॒व दे॒वायु॑व॒ः स॒खिवि॑द॒ः स॒त्राजि॑तं
ध॒नजि॑त॒ः सु॒वर्जि॑तं ॥

ऋ॒चा स्तो॑म॒ः स॒म॒दर्ध॑य गाय॒त्रेण॑ रथ॒न्तरं॑ ।

बृ॒हद्-गा॑य॒त्रव॑र्त॒नि ॥

दे॒वस्य॑ त्वा स॒वितुः॑ प्र॒सवे॑ ऽश्वि॒नोर्बा॒हुभ्यां॑ पू॒ष्णो ह॒स्ताभ्यां॑

गा॒य॒त्रेण॑ छ॒न्दसा॑ ऽऽद॒देऽङ्गि॑र॒स्वद॑भ्रि॒रसि॑ ना॒रि - [] 3

TS 4.1.1.3 - Padam

य॒ज्ञप॑ति॒मिति॑ य॒ज्ञ - प॒तिम् । भ॒गाय॑ । दि॒व्यः । ग॒न्धर्वः॑ ॥ के॒तपू॑रि॒ति
के॒त - पूः । के॒तम् । नः॑ । पु॒नातु॑ । वा॒चः । प॒तिः । वा॒चम् ।

अ॒द्य । स्व॒दाति॑ । नः॑ ॥ इ॒मम् । नः॑ । दे॒व । स॒वितः॑ । य॒ज्ञम् । प्रे॒ति ।

सु॒व । दे॒वायु॑व॒मिति॑ दे॒व - यु॒वम् । स॒खिवि॑द॒मिति॑ स॒खि - वि॒दम् ।

स॒त्राजि॑त॒मिति॑ स॒त्र - जि॒तम् । ध॒नजि॑त॒मिति॑ ध॒न - जि॒तम् ।

सु॒वर्जि॑त॒मिति॑ सु॒वः-जि॒तम् ॥ ऋ॒चा । स्तो॑मम् । स॒मिति॑ । अ॒र्ध॒य ।

गा॒य॒त्रेण॑ । रथ॒न्तर॑मि॒ति रथं॑ - त॒रम् ॥ बृ॒हत् ।

गा॒य॒त्र॒व॒र्त॒नी॒ति॑ गा॒य॒त्र – व॒र्त॒नि॒ ॥ दे॒व॒स्य॑ । त्वा । स॒वि॒तुः । प्र॒स॒व॒
इति॑ प्र – स॒वे । अ॒श्वि॒नोः॑ । बा॒हु॒भ्या॒मि॒ति॑ बा॒हु – भ्या॒म् । पू॒ष्णः॑ ।
ह॒स्ता॒भ्या॒म् । गा॒य॒त्रे॒ण । छ॒न्द॒सा । ए॒ति॑ । द॒दे । अ॒ङ्गि॒र॒स्व॒त् ।
अ॒भिः॑ । अ॒सि॒ । ना॒रिः॑ । 3 (50)

TS 4.1.1.4

–र॒सि॑ पृ॒थि॒व्याः स॒ध॒स्था॑द॒ग्निं॑ पु॒री॒ष्य॑म॒ङ्गि॒र॒स्व॒दा॑ भ॒र॒ त्रै॒ष्टु॒भे॒न॑ त्वा
छ॒न्द॒सा ऽद॒दे॒ऽङ्गि॒र॒स्व॒द्–ब॒भ्रि॒र॒सि॒ ना॒रि॒र॒सि॒ त्वया॑ व॒य॑ꣳ स॒ध॒स्थ
आ॒ग्नि॑ꣳ श॒के॒म॒ ख॒नि॒तुं॑ पु॒री॒ष्यं॑ जा॒ग॒ते॒न॑ त्वा छ॒न्द॒सा
ऽद॒दे॒ऽङ्गि॒र॒स्व॒द्ध॒स्त॑ आ॒धाय॑ स॒वि॒ता बि॒भ्र॒द॒भि॑ꣳ हि॒र॒ण्य॒यीं॑ ।
तया॑ ज्यो॒ति॒र॒ज॒स्र–मि॒द॒ग्निं॑ खा॒त्वी॒ न॒ आ॒ भ॒रा॒नु॒ष्टु॒भे॒न॑ त्वा
छ॒न्द॒सा () ऽद॒दे॒ऽङ्गि॒र॒स्व॒त् ॥ 4

TS 4.1.1.4 - Padam

अ॒सि॒ । पृ॒थि॒व्याः॑ । स॒ध॒स्था॑दि॒ति॑ स॒ध – स्था॒त् । अ॒ग्नि॑म् ।
पु॒री॒ष्य॑म् । अ॒ङ्गि॒र॒स्व॒त् । ए॒ति॑ । भ॒र॒ । त्रै॒ष्टु॒भे॒न॑ । त्वा । छ॒न्द॒सा ।
ए॒ति॑ । द॒दे॒ । अ॒ङ्गि॒र॒स्व॒त् । ब॒भ्रिः॑ । अ॒सि॒ । ना॒रिः॑ । अ॒सि॒ । त्वया॑ ॥

व॒यम् । स॒ध॒स्थ॒ इति॑ स॒ध – स्थे॒ । एति॑ । अ॒ग्निम् । श॒के॒म् ।
 ख॒नि॒तुम् । पु॒री॒ष्यम् । जा॒ग॒तेन॑ । त्वा । छ॒न्द॒सा । एति॑ । द॒दे ।
 अ॒ङ्गि॒र॒स्वत् । ह॒स्ते॑ । आ॒धा॒ये॒त्या॑ – धा॒य । स॒वि॒ता । बि॒भ्रत् ।
 अ॒भि॒म् । हि॒र॒ण्य॒यी॒म् ॥ तया॑ । ज्योतिः॑ । अ॒ज॒स्रम् । इत् । अ॒ग्निम् ।
 खा॒त्वी । नः॑ । एति॑ । भ॒र । आ॒नु॒ष्टु॒भे॒ने॒त्यानु॑ – स्तु॒भे॒न । त्वा ।
 छ॒न्द॒सा () । एति॑ । द॒दे । अ॒ङ्गि॒र॒स्वत् ॥ 4 (53) (इ॒द् – य॒ज्ञं प्र॒सु॒व
 – ना॒रि – रा॒नु॒ष्टु॒भे॒न त्वा॑ छ॒न्द॒सा – त्री॒णि च) (A1)

TS 4.1.2.1

इ॒मा॒म॒गृ॒भ्णन् र॒श॒ना॒मृ॒तस्य॑ पू॒र्व आ॒यु॒षि वि॒द॒थे॒षु क॒व्या ।
 तया॑ दे॒वाः सु॒त॒मा ब॒भूवुर्, ऋ॒त॒स्य॑ सा॒म॒न्थ् स॒र॒मा॒र॒प॒न्ती ॥
 प्र॒तूर्तं॑ वा॒जि॒न्ना द्र॒व व॒रि॒ष्ठा॒म॒नु सँव॑तं ।
 दि॒वि ते॒ जन्म॑ प॒र॒म॒म॒न्त॒रि॒क्षे ना॒भिः पृ॒थि॒व्या॒म॒धि यो॒निः ॥
 यु॒ञ्जा॒था रा॒स॒भं यु॒व॒म॒स्मिन् या॒मे वृ॒ष॒ण्व॒सू ।
 अ॒ग्निं भ॒र॒न्त॒म॒स्म॒युं ॥
 यो॒गे॒यो॒गे त॒व॒स्तरं॑ वा॒जे॒वा॒जे ह॒वा॒म॒हे ।

सखाय॑ इन्द्र॑मू॒तये॑ ॥

प्रतूर्व॑- [] 5

TS 4.1.2.1 - Padam

इ॒माम् । अ॒गृ॒भ्णन् । र॒श॒नाम् । ऋ॒तस्य॑ । पूर्वे॑ । आ॒यु॒षि । वि॒द॒थे॑षु ।
क॒व्या ॥ तया॑ । दे॒वाः । सु॒तम् । ए॒ति । ब॒भू॒वुः । ऋ॒तस्य॑ । सा॒मन् ।
स॒रम् । आ॒र॒प॒न्ती॒त्या - र॒प॒न्ती ॥ प्र॒तूर्त॑मि॒ति प्र - तूर्त॑म् । वा॒जि॒न् ।
ए॒ति । द्र॒व । व॒रि॒ष्ठाम् । अ॒न्वि॒ति । स॒व॒त॒मि॒ति सं - व॒तम् ॥ दि॒वि ।
ते । ज॒न्म । प॒र॒मम् । अ॒न्त॒रि॒क्षे । ना॒भिः । पृ॒थि॒व्याम् । अ॒धी॒ति ।
यो॒निः ॥ यु॒ज्जा॒थाम् । रा॒स॒भम् । यु॒वम् । अ॒स्मि॒न् । या॒मे ।
वृ॒ष॒ण्व॒सू इ॒ति वृ॒ष॒ण् - व॒सू ॥ अ॒ग्नि॒म् । भ॒र॒न्तम् ।
अ॒स्म॒यु॒मि॒त्य॒स्म - यु॒म् ॥ यो॒गे॒यो॒ग इ॒ति यो॒गे - यो॒गे ।
त॒व॒स्तर॑मि॒ति त॒वः - तर॑म् । वा॒जे॒वा॒ज इ॒ति वा॒जे - वा॒जे ।
ह॒वा॒म॒हे ॥ स॒खा॒यः । इन्द्र॑म् । ऊ॒तये॑ ॥
प्र॒तूर्व॑न्नि॒ति प्र - तूर्व॑न् । 5 (50)

TS 4.1.2.2

– त्रे॒ह्य॒व॒क्राम॒न्न॒श॒स्ती॒ रु॒द्र॒स्य॒ गा॒ण॒प॒त्यान्॒ म॒यो॒भू॒रे॒हि॒ ।
उ॒र्व॒न्त॒रि॒क्ष॒म॒न्वि॒हि॒ स्व॒स्ति॒ ग॒व्यू॒ति॒र॒भ॒या॒नि॒ कृ॒ण्व॒न् ॥
पू॒ष्णा॒ स॒यु॒जा॒ सह॒ ।
पृ॒थि॒व्याः॒ स॒ध॒स्था॒द॒ग्निं॑ पु॒रि॒ष्य॒–म॒ङ्गि॒र॒स्व॒–द॒च्छे॒ह्य॒ग्निं॑ पु॒रि॒ष्य॒
–म॒ङ्गि॒र॒स्व॒द॒–च्छे॒मो॒ऽग्निं॑ पु॒रि॒ष्य॒–म॒ङ्गि॒र॒स्व॒द्–भ॒रि॒ष्या॒मो॒ऽग्निं॑ पु॒रि॒ष्य॒–
म॒ङ्गि॒र॒स्व॒द्–भ॒रामः॑ ॥
अ॒न्व॒ग्नि॒रु॒ष॒सा॒–म॒ग्र॒म॒ख्य॒–द॒न्व॒हा॒नि॒ प्र॒थ॒मो॒ जा॒त॒वे॒दाः॑ ।
अ॒नु॒ सूर्य॑स्य – [] 6

TS 4.1.2.2 - Padam

ए॒ति॒ । इ॒हि॒ । अ॒व॒क्राम॒न्नित्य॑व – क्राम॒न् । अ॒श॒स्तीः॑ । रु॒द्र॒स्य॑ ।
गा॒ण॒प॒त्या॒दि॒ति॒ गा॒ण॒ – प॒त्यात् । म॒यो॒भू॒रि॒ति॒ म॒यः॑ – भूः । ए॒ति॒ ।
इ॒हि॒ ॥ उ॒रु॒ । अ॒न्त॒रि॒क्ष॒म् । अ॒न्वि॒ति॒ । इ॒हि॒ । स्व॒स्ति॒ग॒व्यू॒ति॒रि॒ति॒
स्व॒स्ति॒ – ग॒व्यू॒तिः॑ । अ॒भ॒या॒नि॒ । कृ॒ण्व॒न् ॥ पू॒ष्णा॒ । स॒यु॒जे॒ति॒
स॒ – यु॒जा॒ । सह॒ ॥ पृ॒थि॒व्याः॑ । स॒ध॒स्था॒दि॒ति॒ स॒ध॒ – स्था॒त् ।

अ॒ग्निम् । पु॒रि॒ष्य॑म् । अ॒ङ्गि॒र॒स्वत् । अ॒च्छ । इ॒हि । अ॒ग्निम् ।
पु॒री॒ष्य॑म् । अ॒ङ्गि॒र॒स्वत् । अ॒च्छ । इ॒मः । अ॒ग्निम् । पु॒री॒ष्य॑म् ।
अ॒ङ्गि॒र॒स्वत् । भ॒रि॒ष्या॑मः । अ॒ग्निम् । पु॒री॒ष्य॑म् । अ॒ङ्गि॒र॒स्वत् ।
भ॒रामः ॥ अ॒न्वि॒ति । अ॒ग्निः । उ॒ष॒साम् । अ॒ग्रम् । अ॒ख्य॑त् ।
अ॒न्वि॒ति । अ॒हानि॑ । प्र॒थमः । जा॒तवे॑दा इति जा॒त – वे॒दाः ॥
अ॒न्वि॒ति । सू॒र्य॑स्य । 6 (50)

TS 4.1.2.3

पु॒रु॒त्रा च र॒श्मी॑ननु द्यावा॑पृ॒थि॒वी आ त॑तान ॥
आ॒ग॒त्य वा॒ज्य॑ध्व॒नः सर्वा॑ मृ॒धो वि॒धू॑नुते ।
अ॒ग्नि॑ꣳ स॒ध॒स्थे म॒हति॑ चक्षु॒षा नि चि॑कीषते ॥
आ॒क्र॒म्य वा॒जिन् पृ॒थि॒वीम॒ग्निमि॑च्छ रु॒चा त्वं ।
भू॒म्या वृ॒त्वाय॑ नो ब्रू॒हि यतः॑ ख॒नाम॒ तं व॑यं ॥
द्यौ॒स्ते पृ॒ष्ठं पृ॒थि॒वी स॒ध॒स्थमा॒त्मा ऽन्तरि॑क्षꣳ स॒मु॒द्रस्ते॒ योनिः॑ ।
वि॒ख्याय॑ चक्षु॒षा त्वम॑भि तिष्ठ- [] 7

TS 4.1.2.3 - Padam

पुरु॑त्रेति॑ पुरु॑ – त्रा॑ । च॑ । र॒श्मीन् । अ॒न्वि॒ति॑ । द्या॒वापृ॑थि॒वी इति॑
द्या॒वा – पृ॒थि॒वी । ए॒ति॑ । त॒तान॑ ॥ आ॒ग॒त्ये॒त्या – ग॒त्य॑ । वा॒जी ।
अ॒ध्व॒नः । सर्वाः॑ । मृ॒धः । वी॒ति॑ । धू॒नु॒ते ॥ अ॒ग्नि॒म् ।
स॒ध॒स्थ इति॑ स॒ध – स्थे॑ । म॒ह॒ति॑ । चक्षु॑षा । नी॒ति॑ । चि॒की॒ष॒ते ॥
आ॒क्र॒म्ये॒त्या – क्र॒म्य॑ । वा॒जि॒न् । पृ॒थि॒वीम् । अ॒ग्नि॒म् । इ॒च्छ॑ ।
रु॒चा । त्वम् ॥ भू॒म्याः । वृ॒त्वा॒य । नः॑ । ब्रू॒हि॒ । य॒तः । ख॒ना॒म । तम् ।
व॒यम् ॥ द्यौः॑ । ते॑ । पृ॒ष्ठम् । पृ॒थि॒वी । स॒ध॒स्थ॒मि॒ति स॒ध – स्थम्॑ ।
आ॒त्मा । अ॒न्त॒रि॒क्षम् । स॒मु॒द्रः । ते॑ । यो॒निः ॥ वि॒ख्या॒येति॑
वि – ख्या॑य । चक्षु॑षा । त्वम् । अ॒भी॒ति॑ । ति॒ष्ठ॑ । 7 (50)

TS 4.1.2.4

पृ॒त॒न्य॒तः ॥
उ॒त्क्रा॑म॒ मह॑ते सौ॒भ॒गा॒या – स्मा॒दा॒स्था॒नाद् द्र॑वि॒णो॒दा वा॑जि॒न् ।
व॒यं स्या॑म॒ सु॒म॒तौ पृ॑थि॒व्या अ॒ग्निं ख॑नि॒ष्यन्त॑ उप॒स्थे अ॒स्याः ॥
उ॒द॒क्र॒मीद् द्र॑वि॒णो॒दा वा॒ज्य॒र्वा॒ऽकः॑ स॒ लो॒कं सु॑कृ॒तं पृ॑थि॒व्याः ।

ततः॑ ख॒नेम॑ सु॒प्र॒ती॒क॒म॒ग्नि॑ꣳ सु॒वो रु॒हा॒णा अ॒धि ना॒क उत्त॑मे ॥

अ॒पो दे॒वीरु॒प सृ॒ज म॒धु॒म॒ती॒रय॑क्ष॒माय॑ प्र॒जाभ्यः॑ ।

तासा॑ꣳ स्था॒नादु॒ज्जि॒हता॑-मोष॑धयः सु॒पिप्प॒लाः ॥

जिघ॑र्म्य- [] 8

TS 4.1.2.4 - Padam

पृ॒त॒न्य॒तः ॥ उ॒दि॒ति । क्रा॒म । म॒ह॒ते । सौ॒भ॒गाय॑ । अ॒स्मात् ।

आ॒स्था॒नादि॒त्या - स्था॒नात् । द्र॒वि॒णो॒दा इति॑ द्र॒वि॒णः - दाः ।

वा॒जि॒न् ॥ व॒यम् । स्या॒म । सु॒म॒तावि॑ति सु - म॒तौ । पृ॒थि॒व्याः ।

अ॒ग्नि॒म् । ख॒नि॒ष्य॒न्तः । उ॒प॒स्थ इत्यु॒प - स्थे॑ । अ॒स्याः ॥ उ॒दि॒ति ।

अ॒क्र॒मी॒त् । द्र॒वि॒णो॒दा इति॑ द्र॒वि॒णः - दाः । वा॒जी । अ॒र्वा । अ॒कः ।

सः । लो॒कम् । सु॒कृ॒त॒मि॒ति सु॒-कृ॒तम् । पृ॒थि॒व्याः ॥ ततः॑ । ख॒नेम॑ ।

सु॒प्र॒ती॒क॒मि॒ति सु॒-प्र॒ती॒कम् । अ॒ग्नि॒म् । सु॒वः । रु॒हा॒णाः । अ॒धी॒ति ।

ना॒के ॥ उ॒त्त॒म इत्यु॒त् - त॒मे ॥ अ॒पः । दे॒वीः । उ॒पे॒ति । सृ॒ज ।

म॒धु॒म॒ती॒रि॒ति म॒धु - म॒तीः । अ॒य॒क्ष॒माय॑ । प्र॒जा॒भ्य इति॑ प्र॒-जा॒भ्यः ॥

ता॒साम् । स्था॒नात् । उ॒दि॒ति । जि॒ह॒ताम् । ओष॑धयः ।

सु॒पि॒प्प॒ला इति॑ सु – पि॒प्प॒लाः ॥ जिघ॑र्मि । 8 (50)

TS 4.1.2.5

–ग्निं॑ मन॒सा घृ॒तेन॑ प्र॒ति॒क्ष्यन्तं॑ भुव॒नानि॑ वि॒श्वा ।

पृ॒थुं ति॒रश्वा॑ वय॒सा बृ॒हन्तं॑ व्य॒चि॒ष्ठम॒न्नं र॒भसं॑ वि॒दानं॑ ॥

आ त्वा जिघ॑र्मि वच॒सा घृ॒तेना॑ऽर॒क्षसा॑ मन॒सा तज्जु॑षस्व ।

मर्य॑श्रीः स्पृ॒हय॑द्–व॒र्णो अ॒ग्निर्ना॑ऽभि॒मृशे॑ त॒नुवा॑ ज॒र्ह॒षाणः॑ ॥

परि॑ वाज॒पतिः॑ क॒विर॒ग्निर् ह॒व्यान्य॑क्री॒मीत् ।

दध॑द् र॒त्नानि॑ दा॒शुषे॑ ॥

परि॑ त्वा॒ग्ने पु॒रं व॒यं वि॒प्रं स॒हस्य॑ धीमहि ।

धृ॒षद् वर्णं॑ दि॒वेदि॑वे भे॒त्तारं॑ () भ॒ङ्गुरा॑वतः ॥

त्वम॑ग्ने द्यु॒भिस्त्व॑–मा॒शुशु॑क्ष॒णिस्त्व॑–म॒द्भ्यस्त्व॑–म॒श्म॒नस्परि॑ ।

त्वं व॒नैभ्य॑ स्त्वमो॒षधी॑भ्य॒ स्त्वं नृ॑णां नृ॒पते॑ जायसे शु॒चिः ॥ 9

TS 4.1.2.5 - Padam

अ॒ग्नि॒म् । म॒न॒सा । घृ॒तेन॑ । प्र॒ति॒क्ष्य॒न्त॒मि॒ति॑ प्र॒ति – क्ष्य॒न्त॒म् ।
भु॒व॒ना॒नि । वि॒श्वा ॥ पृ॒थु॒म् । ति॒रश्वा । व॒य॒सा । बृ॒ह॒न्त॒म् । व्य॒चि॒ष्ठ॒म् ।
अ॒न्न॒म् । र॒भ॒स॒म् । वि॒दा॒न॒म् ॥ ए॒ति॑ । त्वा । जि॒घ॒र्मि॑ । व॒च॒सा ।
घृ॒तेन॑ । अ॒रक्ष॑सा । म॒न॒सा । तत् । जु॒ष॒स्व ॥ म॒र्य॑श्री॒रि॒ति॑ म॒र्य॑-श्रीः ।
स्पृ॒ह॒य॒द्वर्ण॑ इति॑ स्पृ॒ह॒य॒त् – वर्णः॑ । अ॒ग्निः । न । अ॒भि॒मृ॒श
इ॒त्य॒भि – मृ॒शे ॥ त॒नु॒वा । ज॒र्ह॒षा॒णः ॥ प॒री॒ति॑ । वा॒ज॒प॒ति॒रि॒ति॑
वा॒ज – प॒तिः । क॒विः । अ॒ग्निः । ह॒व्या॒नि । अ॒क्र॒मी॒त् ॥ द॒ध॒त् ।
र॒त्ना॒नि । दा॒शु॒षे ॥ प॒री॒ति॑ । त्वा । अ॒ग्ने । पु॒र॒म् । व॒य॒म् । वि॒प्र॒म् ।
स॒ह॒स्य॑ । धी॒म॒हि ॥ धृ॒ष॒द्वर्ण॑मि॒ति॑ धृ॒ष॒त् – वर्ण॑म् । दि॒वे॒दि॒व इति॑
दि॒वे – दि॒वे । भे॒त्ता॒र॒म् () । भ॒ङ्गु॒रा॒व॒त इति॑ भ॒ङ्गु॒र – व॒तः ॥
त्व॒म् । अ॒ग्ने । द्यु॒भि॒रि॒ति॑ द्यु – भिः॑ । त्व॒म् । आ॒शु॒शु॒क्ष॒णिः ।
त्व॒म् । अ॒द्भ्य॑ इत्य॒त् – भ्यः॑ । त्व॒म् । अ॒श्म॑नः । प॒रि ॥ त्व॒म् ।
व॒नै॒भ्यः॑ । त्व॒म् । ओ॒ष॒धी॒भ्य॑ इत्यो॒ष॒धि – भ्यः॑ । त्व॒म् । नृ॒णा॒म् ।

नृ॒प॒त इति॑ नृ॒-प॒ते । जा॒य॒से । शु॒चिः॑ ॥ ९ (७०) (प्र॒तू॒र्व॒न्थ् -
सू॒र्य॑स्य - ति॒ष्ठ - जि॒घ॑र्मि - भे॒त्ता॑रं - वि॒ञ्श॑तिश्च) (A2)

TS 4.1.3.1

दे॒व॒स्य॑ त्वा स॒वि॒तुः॑ प्र॒स॒वे॑ऽश्वि॒नौ॑ बा॒हु॒भ्यां॑ पू॒ष्णो॑ ह॒स्ता॑भ्यां
पृ॒थि॒व्याः॑ स॒ध॒स्थे॑ऽग्निं पु॒री॒ष्य॑-म॒ङ्गि॒र॒स्वत्॑ ख॒नामि॑ ॥

ज्यो॒ति॒ष्म॒न्तं॑ त्वा॒ग्ने सु॒प्र॒ती॒क॒म॒ज॒स्रे॑ण भा॒नु॒ना दी॒द्या॑नं ।

शि॒वं प्र॒जा॒भ्यो॑ऽहि॒ञ् स॒न्तं॑ पृ॒थि॒व्याः॑ स॒ध॒स्थे॑ऽग्निं पु॒री॒ष्य॑
-म॒ङ्गि॒र॒स्वत्॑ ख॒नामि॑ ॥

अ॒पां पृ॒ष्ठ॒म॒सि स॒प्र॒था उ॒र्व॒ग्निं॑ भ॒रि॒ष्य॑द॒प॒रा॒व॒पि॒ष्ठं॑ ।

व॒र्ध॑मानं म॒ह आ च॑ पु॒ष्करं॑ दि॒वो मा॒त्र॒या व॒रि॒णा प्र॑थ॒स्व ॥

श॒र्म च॑ स्थो- [] 10

TS 4.1.3.1 - Padam

दे॒व॒स्य॑ । त्वा । स॒वि॒तुः॑ । प्र॒स॒व इति॑ प्र - स॒वे । अ॒श्वि॒नौः॑ ।

बा॒हु॒भ्यामि॑ति बा॒हु - भ्या॒म् । पू॒ष्णः॑ । ह॒स्ता॑भ्याम् । पृ॒थि॒व्याः॑ ।

स॒ध॒स्थ इति॑ स॒ध - स्थे॑ । अ॒ग्नि॑म् । पु॒री॒ष्य॑म् । अ॒ङ्गि॒र॒स्वत्॑ ।

ख॒ना॒मि॒ ॥ ज्यो॑ति॒ष्मन्त॑म् । त्वा॒ । अ॒ग्ने॒ ।
सु॒प्र॒ती॒क॒मि॒ति॒ सु॒ – प्र॒ती॒क॒म् । अ॒ज॒स्रे॑ण । भा॒नु॒ना॑ ॥ दी॒द्या॒न॒म् ॥
शि॒व॒म् । प्र॒जा॒भ्य॒ इति॑ प्र॒ – जा॒भ्यः॑ । अ॒हि॒ऽस॒न्त॑म् । पृ॒थि॒व्याः ।
स॒ध॒स्थ॒ इति॑ स॒ध॒ – स्थे॒ । अ॒ग्नि॑म् । पु॒री॒ष्य॑म् । अ॒ङ्गि॒र॒स्वत् ।
ख॒ना॒मि॒ ॥ अ॒पा॒म् । पृ॒ष्ठ॑म् । अ॒सि॒ । स॒प्र॒था॒ इति॑ स॒ – प्र॒थाः॑ ॥
उ॒रु॒ । अ॒ग्नि॑म् । भ॒रि॒ष्य॑त् । अ॒प॒रा॒व॒पि॒ष्ठ॒मि॒त्य॒प॒रा॒ – व॒पि॒ष्ठ॑म् ॥
व॒र्ध॑मानम् । म॒हः॑ । ए॒ति॑ । च॒ । पु॒ष्क॒र॑म् । दि॒वः॑ । मा॒त्र॒या॒ ।
व॒रि॒णा॒ । प्र॒थ॒स्व ॥ श॒र्म॑ । च॒ । स्थः॑ । 10 (50)

TS 4.1.3.2

व॒र्म॑ च॒ स्थो॑ अ॒च्छि॒द्रे॑ ब॒हु॒ले॑ उ॒भे॒ ।
व्य॑च॒स्व॒ती॒ सं॑ व॒सा॒थां॑ भ॒र्त॒म॒ग्निं॑ पु॒री॒ष्यं॑ ॥
सँव॑सा॒था॒ सु॒व॒र्वि॒दा॑ स॒मी॒ची॒ उ॒र॒सा॒ त्म॒ना॑ ॥
अ॒ग्नि॑म॒न्त॒ भ॒रि॒ष्य॑न्ती॒ ज्यो॑ति॒ष्मन्त॑ म॒ज॒स्र॑मि॒त् ॥
पु॒री॒ष्यो॑ऽसि॒ विश्व॑भ॒राः॑ ।
अथ॑र्वा॒ त्वा॒ प्र॒थ॒मो॑ नि॒र॒म॒न्थ॑द॒ग्ने॒ ॥

त्वा॑म॒ग्ने पु॒ष्क॒रा॒द॒द्ध्य॒थ॒र्वा नि॒रम॒न्थ॒त ।

मू॒द॒ध॒र्नो वि॒श्व॒स्य॒ वा॒घ॒तः ॥

त॒मु त्वा द॒द्ध्य॒ङ् ऋ॒षिः पु॒त्र ई॒धे – [] 11

TS 4.1.3.2 - Padam

व॒र्म । च । स्थः॑ । अ॒च्छि॒द्रे इति॑ । ब॒हु॒ले इति॑ । उ॒भे इति॑ ॥

व्य॒च॒स्व॒ती इति॑ । स॒मि॒ति । व॒सा॒था॒म् । भ॒र्त॒म् । अ॒ग्नि॒म् ।

पु॒री॒ष्य॒म् ॥ स॒मि॒ति । व॒सा॒था॒म् । सु॒व॒र्वि॒दे॒ति सु॒वः – वि॒दा ॥

स॒मी॒ची इति॑ । उ॒र॒सा । त्म॒ना ॥ अ॒ग्नि॒म् । अ॒न्तः । भ॒रि॒ष्य॒न्ती इति॑ ।

ज्यो॒ति॒ष्म॒न्त॒म् । अ॒ज॒स्र॒म् । इत् ॥ पु॒री॒ष्यः । अ॒सि । वि॒श्व॒भ॒रा इति॑

वि॒श्व – भ॒राः ॥ अथ॑र्वा । त्वा । प्र॒थ॒मः । नि॒रि॒ति । अ॒म॒न्थ॒त् ।

अ॒ग्ने ॥ त्वा॒म् । अ॒ग्ने । पु॒ष्क॒रा॒त् । अधी॑ति । अथ॑र्वा । नि॒रि॒ति ।

अ॒म॒न्थ॒त ॥ मू॒द॒ध॒र्नः । वि॒श्व॒स्य॒ वा॒घ॒तः ॥ त॒म् । उ॒ । त्वा ।

द॒द्ध्य॒ङ् । ऋ॒षिः । पु॒त्रः । ई॒धे । 11 (50)

TS 4.1.3.3

अ॒थर्व॑णः ।

वृ॒त्र॒ह॒णं॑ पु॒र॒न्द॒रं॑ ॥

त॒मु॒ त्वा पा॒थ्यो वृ॒षा॒ समी॑धे द॒स्यु॒ह॒न्त॒मं॑ ।

ध॒न॒ञ्ज॒य॒ र॒णो॒रणे॑ ॥

सी॒द॒ हो॒तः॑ स्व॒ उ॒ लो॒के चि॒कि॒त्वान्त् सा॒दया॑ य॒ज्ञ॒

सु॒कृ॒त॒स्य॑ यो॒नौ॑ ।

दे॒वा॒वी॒र्दे॒वान् ह॒विषा॑ य॒जा॒स्य॒ग्ने बृ॒हद्-य॑ज॒माने॑ व॒यो धाः॑ ॥

नि॒ हो॒ता हो॒तृष॑द॒ने वि॒दान॑स्त्वे॒षो दी॒दि॒वा॒ अस॑द॒त् सु॒दक्षः॑ ।

अ॒द॒ब्ध॒व्र॒त प्र॑म॒तिर्व॑सि॒ष्ठः स॒हस्रं॑ भ॒रः शु॒चि॒जिह्वा॑ अ॒ग्निः ॥

स॒ सी॒द॒स्व म॒हा॒ असि॑ शोच॒स्व- [] 12

TS 4.1.3.3 - Padam

अ॒थर्व॑णः ॥ वृ॒त्र॒ह॒णमि॑ति वृ॒त्र - ह॒न॒म् । पु॒र॒न्द॒रमि॑ति पु॒रं - द॒र॒म् ॥

त॒म् । उ॒ । त्वा । पा॒थ्यः । वृ॒षा । स॒मि॒ति । ई॒धे ।

द॒स्यु॒ह॒न्त॒ममि॑ति द॒स्यु॒-ह॒न्त॒म॒म् ॥ ध॒न॒ञ्ज॒यमि॑ति ध॒नं - ज॒य॒म् ।

रणे॑रण इति॑ रणे॑-रणे॑ ॥ सीद॑ । होतः॑ । स्वे॑ । उ॑ । लो॒के ।
चि॒कि॒त्वान् । सा॒दय॑ । य॒ज्ञम् । सु॒कृत॑स्येति॑ सु-कृत॑स्य॑ । यो॒नौ ॥
दे॒वावी॑रिति॑ दे॒व-अ॒वीः । दे॒वान् । ह॒विषा॑ । य॒जासि॑ । अ॒ग्ने॑ । बृ॒हत् ।
यज॑माने । वयः॑ । धाः॑ ॥ नीति॑ । हो॒ता । हो॒तृष॑दन इति॑ हो॒तृ-स॑दने ।
वि॒दानः । त्वे॒षः । दी॒दि॒वान् । अ॒सद॑त् । सु॒दक्ष॑ इति॑ सु - दक्षः॑ ॥
अ॒द॒ब्ध॒व्रत॑ प्र॒मति॑रित्य॒द॒ब्ध॒व्रत॑-प्र॒मतिः॑ । व॒सिष्ठः॑ । स॒हस्र॑भर इति॑
स॒हस्र॑-भरः॑ । शु॒चि॒जिह्वा॑ इति॑ शु॒चि - जि॒ह्वः । अ॒ग्निः ॥ स॒मिति॑ ।
सी॒दस्व॑ । म॒हान् । अ॒सि । शो॒चस्व॑ । 12 (50)

TS 4.1.3.4

दे॒ववी॑तमः ।

वि॒ धू॒म॒ग्ने अ॒रुषं॑ मि॒येद्ध्य॑ सृ॒ज प्र॑शस्त द॒र्श॒तं ॥
ज॒निष्वा॑ हि जे॒न्यो अ॒ग्रे अ॒ह्नाꣳ हि॒तो हि॒तेष्व॑रुषो वने॑षु ।
द॒मे॒दमे॑ स॒प्त र॒त्ना द॒धानो॑ऽग्निर्हो॒ता नि॑ ष॒सादा॑ य॒जीया॑न् ॥ 13

TS 4.1.3.4 - Padam

दे॒व॒वी॒त॒म॒ इति॑ दे॒व – वी॒त॒मः॑ ॥ वी॒ति॑ । धू॒म॒म् । अ॒ग्ने॑ । अ॒रु॒ष॒म् ।
मि॒ये॒द्ध्य॑ । सृ॒ज॑ । प्र॒श॒स्तेति॑ प्र – श॒स्त॑ । द॒र्श॒त॒म् ॥ ज॒नि॒ष्व॑ ।
हि॑ । जे॒न्यः॑ । अ॒ग्रे॑ । अ॒ह्ना॒म् । हि॒तः॑ । हि॒तेषु॑ । अ॒रु॒षः॑ । व॒नेषु॑ ॥
द॒मे॒द॒म॒ इति॑ द॒मे – द॒मे॑ । स॒प्त॑ । र॒त्ना॑ । द॒धा॒नः॑ । अ॒ग्निः॑ । हो॒ता॑ ॥
नी॒ति॑ । स॒सा॒द॒ । य॒जी॒यान् ॥ 13 (27)

(स्थ – ई॒धे – शोच॑स्व – स॒प्त॒वि॒ंश॒तिश्च॑) – (A3)

TS 4.1.4.1

सं ते वा॒यु॒र्मा॒त॒रि॒श्वा द॒धा॒तू॒त्ता॒ना॒यै हृ॒द॒यं॑ य॒द्वि॒लि॒ष्टं॑ ।
दे॒वा॒नां॑ य॒श्च॒र॒ति प्रा॒ण॒थे॒न तस्मै॑ च दे॒वि व॒ष॒ड॒स्तु॑ तु॒भ्यं॑ ॥
सु॒जा॒तो ज्यो॒ति॒षा स॒ह श॒र्म व॒रू॒थ॒मा॒ऽस॒दः॑ सु॒वः॑ ।
वा॒सो अ॒ग्ने वि॒श्व॒रू॒पं सँव्य॑यस्व वि॒भा॒व॒सो ॥
उ॒दु तिष्ठ॑ स्व॒ध्व॒रा॒वा नो॑ दे॒व्या कृ॒पा ।
दृ॒शे च॑ भा॒सा बृ॒ह॒ता सु॒शु॒क्व॒नि॒रा॒ग्ने या॒हि सु॒श॒स्ति॒भिः॑ ॥ 14

TS 4.1.4.1 - Padam

स॒मि॒ति॑ । ते । वा॒युः । मा॒तरि॒श्वा॑ ॥ द॒धातु॑ । उ॒त्ता॒नाया॑
इ॒त्यु॒त् – ता॒नायै॑ ॥ हृ॒दय॑म् । यत् । वि॒लि॒ष्टमि॒ति॑ वि – लि॒ष्टम् ॥
दे॒वाना॑म् । यः । च॒रति॑ । प्रा॒णथे॒नेति॑ प्र – अ॒नथे॒न । तस्मै॑ । च ।
दे॒वि । व॒षट् । अ॒स्तु । तु॒भ्यम् ॥ सु॒जा॒त इति॑ सु॒-जा॒तः ।
ज्यो॒तिषा॑ । स॒ह । श॒र्म । व॒रूथ॑म् । ए॒ति । अ॒सदः॑ । सु॒वः ॥
वा॒सः । अ॒ग्ने । वि॒श्वरू॑पमि॒ति॑ वि॒श्व – रू॒पम् । स॒मि॒ति॑ । व्य॒यस्व॑ ।
वि॒भा॒वसो॑ इति॑ वि॒भा-व॒सो ॥ उ॒दि॒ति॑ । उ । ति॒ष्ठ । स्व॒द्ध्वरे॑ति
सु – अ॒द्ध्वर॑ । अ॒व । नः । दे॒व्या । कृ॒पा ॥ दृ॒शे । च । भा॒सा ।
बृ॒हता॑ । सु॒शु॒क्वनि॑रिति॑ सु॒-शु॒क्वनिः॑ । ए॒ति । अ॒ग्ने । या॒हि ।
सु॒श॒स्तिभि॑रिति॑ सु॒श॒स्ति – भिः ॥ 14 (50)

TS 4.1.4.2

ऊ॒र्ध्व ऊ॒ षु॒ ण॒ ऊ॒तये॑ ति॒ष्ठा दे॒वो न॑ स॒विता॑ ।
ऊ॒र्ध्वो वा॒जस्य॑ स॒निता॑ यद॒ज्जि॒भि-वा॒घद्भि॑-वि॒ह्वया॑महे ॥
स जा॒तो गर्भो॑ अ॒सि रो॑द॒स्यो॒रग्ने॑ चा॒रुर्वि॑भृ॒त ओष॑धीषु ।

चि॒त्रः शि॒शुः परि॒ तमा॑स्य॒क्तः प्र॒ मा॒तृ॒भ्यो॒ अधि॒ कनि॑क्रद॒द्वाः ॥

स्थि॒रो भव॑ वी॒ड्वङ्ग॑ आ॒शु॒र्भव॑ वा॒ज्य॒र्वन् ।

पृ॒थु॒र्भव॑ सु॒षद॒स्त्वम॒ग्नेः पु॒री॒षवा॑हनः ॥

शि॒वो भव॑ – [] 15

TS 4.1.4.2 - Padam

ऊ॒र्ध्वः । उ॒ । स्वि॒ति । नः । ऊ॒तये॑ । तिष्ठ॑ । दे॒वः । न । स॒वि॒ता ॥

ऊ॒र्ध्वः । वा॒जस्य॑ । स॒नि॒ता । यत् । अ॒ज्जि॒भिरि॒त्यज्जि॑ – भिः ।

वा॒घद्वि॒रिति॑ वा॒घत् – भिः । वि॒ह्वया॑म॒ह इति॑ वि – ह्वया॑म॒हे ॥ सः ।

जा॒तः । गर्भः॑ । अ॒सि । रो॒दस्योः॑ । अ॒ग्ने । चा॒रुः । वि॒भृ॒त इति॑

वि – भृ॒तः । ओ॒षधी॑षु ॥ चि॒त्रः । शि॒शुः । प॒री॒ति । तमा॑सी ।

अ॒क्तः । प्रे॒ति । मा॒तृ॒भ्य इति॑ मा॒तृ – भ्यः । अधी॑ति । कनि॑क्रदत् ।

गाः ॥ स्थि॒रः । भव॑ । वी॒ड्वङ्ग॑ इति॑ वी॒डु – अ॒ङ्गः । आ॒शुः । भव॑ ।

वा॒जी । अ॒र्वन् ॥ पृ॒थुः । भव॑ । सु॒षद॑ इति॑ सु – स॒दः । त्वम् ।

अ॒ग्नेः । पु॒री॒षवा॑हन इति॑ पु॒री॒ष – वा॑हनः ॥ शि॒वः । भव॑ । 15 (50)

TS 4.1.4.3

प्र॒जा॒भ्यो॒ मा॒नु॒षी॒भ्यस्त्वम॑ङ्गिरः ।
मा॒ द्या॒वापृ॑थि॒वी अ॒भि शू॒शुचो॑ मा॒ऽन्तरि॑क्षं मा॒ वन॑स्पतीन् ॥
प्रै॒तु वा॒जी क॒निक्र॑द-नान॒दद्-रा॒सभः॑ प॒त्वा ।
भर॑न्न॒ग्निं पु॒रीष्यं॑ मा॒ पा॒द्यायु॑षः पु॒रा ॥
रा॒सभो॑ वां क॒निक्र॑दथ् सु॒युक्तो॑ वृष॒णा रथे॑ ।
स वा॒म॒ग्निं पु॒रीष्य॑माशु॒र्दूतो॑ वहा॒दितः॑ ॥
वृषा॑ऽग्निं वृष॒णं भर॑न्न॒पां गर्भ॑ऽसमु॒द्रियं॑ ।
अ॒ग्न आ॒ याहि॑- [] 16

TS 4.1.4.3 - Padam

प्र॒जा॒भ्य इति॑ प्र - जा॒भ्यः । मा॒नु॒षी॒भ्यः । त्वम् । अ॒ङ्गिरः॑ ॥
मा । द्या॒वापृ॑थि॒वी इति॑ द्या॒वा - पृ॒थि॒वी । अ॒भीति॑ । शू॒शुचः॑ । मा ।
अ॒न्तरि॑क्षम् । मा । वन॑स्पतीन् ॥ प्रै॒ति । ए॒तु । वा॒जी । क॒निक्र॑दत् ।
ना॒नद॑त् । रा॒सभः॑ । प॒त्वा ॥ भर॑न् । अ॒ग्निम् । पु॒रीष्य॑म् । मा ।
पा॒दि । आ॒युषः॑ । पु॒रा ॥ रा॒सभः॑ । वा॒म् । क॒निक्र॑दत् ।

सु॒यु॒क्त॑ इति॒ सु – यु॒क्तः॑ । वृ॒ष॒णा । रथे॑ ॥ सः॑ । वा॒म् । अ॒ग्नि॒म् ।
पु॒री॒ष्य॒म् । आ॒शुः॑ । दू॒तः॑ । व॒हात् । इ॒तः॑ ॥ वृ॒षा । अ॒ग्नि॒म् ।
वृ॒ष॒ण॒म् । भ॒र॒न् । अ॒पा॒म् । गर्भ॑म् । स॒मु॒द्रि॒य॒म् ॥
अ॒ग्ने॑ । ए॒ति॑ । या॒हि॑ । 16 (50)

TS 4.1.4.4

वी॒त॒य॑ ऋ॒त॒ꣳ स॒त्यं॑ ॥
ओष॑ध॒यः॒ प्र॒ति॑ गृ॒ह्णी॒ताऽग्नि॑मे॒त॒ꣳ शि॒व॒मा॒य॒न्त॒म॒भ्य॑त्र॒ यु॒ष्मा॒न् ।
व्य॑स्यन् वि॒श्वा॒ अ॒म॒ती॒रा॒ती-नि॑षी॒द॒न्तो॒ अप॑ दु॒र्म॒ति॒ꣳ ह॒न॒त् ॥
ओष॑ध॒यः॒ प्र॒ति॑ मो॒द॒ध्व॒मे॒नं॒ पु॒ष्पा॒व॒तीः॒ सु॒पि॒प्प॒लाः ।
अ॒यं॑ वो॒ गर्भ॑ ऋ॒त्वि॒यः॒ प्र॒त्न॒ꣳ स॒ध॒स्थ॒मा॒ ऽस॑दत् ॥ 17

TS 4.1.4.4 - Padam

वी॒त॒ये॑ । ऋ॒त॒म् । स॒त्य॒म् ॥ ओष॑ध॒यः॒ । प्र॒ती॒ति॑ । गृ॒ह्णी॒त॒ । अ॒ग्नि॒म् ।
ए॒त॒म् । शि॒व॒म् । आ॒य॒न्त॒मि॒त्या॑ – य॒न्त॒म् । अ॒भी॒ति॑ । अ॒त्र॒ । यु॒ष्मा॒न् ॥
व्य॑स्यन्नि॒ति॒ वि – अ॒स्य॑न् । वि॒श्वाः॑ । अ॒म॒तीः॑ । अ॒रा॒तीः॑ ।
नि॒षी॒द॒न्नि॒ ति॒ नि – सी॒द॒न् । नः॑ । अ॒पे॒ति॑ । दु॒र्म॒ति॒मि॒ति॑ दुः- म॒ति॒म् ।

ह॒नत् ॥ ओ॒ष॒धयः॑ । प्र॒ती॒तिः॑ । मो॒द॒ध्वम् । ए॒नम् ।
पु॒ष्पा॒वती॑रि॒ति पु॒ष्प – व॒तीः॑ । सु॒पि॒प्प॒ला इति॑ सु – पि॒प्प॒लाः ॥
अ॒यम् । वः॑ । गर्भः॑ । ऋ॒त्वि॒यः॑ । प्र॒त्नम् । स॒ध॒स्थ॒मिति॑ स॒ध–स्थम् ।
ए॒ति । अ॒स॒दत् ॥ 17 (36) (सु॒श॒स्ति॒भिः॑ – शि॒वो भ॑व – या॒हि –
ष॒ट्त्रिं॑श॒च्च) (A4)

TS 4.1.5.1

वि पा॒ज॒सा पृ॒थु॒ना शो॒शु॒चा॒नो बा॒ध॒स्व द्वि॒षो र॒क्ष॒सो अ॒मी॒वाः ।
सु॒श॒र्म॒णो बृ॒ह॒तः श॒र्म॒णि स्या॒म॒ग्ने॒रह॑ सु॒ह॒व॒स्य प्र॒णी॒तौ ॥
आ॒पो हि॒ ष्ठा म॒यो॒भु॒व॒स्ता न ऊ॒र्जे द॒धा॒त॒न ।
म॒हे र॒णाय॑ च॒क्ष॒से ॥
यो वः॑ शि॒व॒त॒मो र॒स॒स्त॒स्य भा॒ज॒य॒ते॒ह नः॑ ।
उ॒श॒ती॒रि॒व मा॒तरः॑ ॥
त॒स्मा अ॒रं ग॒मा॒म वो॒ य॒स्य क्ष॒या॒य जि॒न्व॒थ ।
आ॒पो ज॒न॒य॒था च॒ नः॑ ॥

मि॒त्रः – [] 18

TS 4.1.5.1 - Padam

वी॒ति॑ । पा॒ज॒सा । पृ॒थु॒ना॑ ॥ शो॒शु॒चा॒नः॑ । बा॒ध॒स्व । द्वि॒षः॑ । र॒क्ष॒सः॑ ।
अमी॑वाः ॥ सु॒शर्म॑ण इति॑ सु – शर्म॑णः । बृ॒ह॒तः॑ । शर्म॑णि । स्या॒म् ।
अ॒ग्नेः॑ । अ॒ह॒म् । सु॒ह॒व॒स्येति॑ सु-ह॒व॒स्य । प्र॒णी॒ता॒वि॒ति॒ प्र-नी॒तौ ॥
आ॒पः । हि । स्थ । म॒यो॒भुव॑ इति॑ म॒यः-भुवः॑ । ताः । नः । ऊ॒र्जे ।
द॒धा॒त॒न ॥ म॒हे । र॒णाय॑ । च॒क्ष॒से ॥ यः । वः । शि॒व॒त॒म॒ इति॑
शि॒व-त॒मः । र॒सः । त॒स्य । भा॒ज॒य॒त । इ॒ह । नः ॥ उ॒श॒तीः । इ॒व ।
मा॒त॒रः ॥ त॒स्मै ॥ अ॒र॒म् । ग॒मा॒म । वः । य॒स्य । क्ष॒या॒य । जि॒न्व॒थ ॥
आ॒पः । ज॒न॒य॒थ । च । नः ॥ मि॒त्रः । 18 (50)

TS 4.1.5.2

स॒ꣳसृ॒ज्य॑ पृ॒थि॒वीं॑ भू॒मिं॑ च॒ ज्यो॒ति॒षा॑ स॒ह ।
सु॒जा॒तं॑ जा॒त॒वे॒द॒स॒म॒ग्निं॑ वै॒श्वा॒न॒रं॑ वि॒भुं ॥
अ॒य॒क्ष्मा॑य॒ त्वा स॒ꣳसृ॒जामि॑ प्र॒जा॒भ्यः॑ ।
वि॒श्वे॑ त्वा दे॒वा वै॒श्वा॒न॒राः स॒ꣳसृ॒ज॒न्त्वा-नु॑ष्टु॒भेन॑ छ॒न्द॒साऽङ्गि॒र॒स्वत् ॥
रु॒द्राः स॒ंभृ॑त्य॒ पृ॒थि॒वीं॑ बृ॒ह॒ज्ज्यो॒तिः॑ स॒मी॒धि॒रे ।

तेषां॑ भानुरजस्र॑ इच्छुक्रो॑ दे॒वेषु॑ रोचते ॥

सꣳ सृष्टां॑ वसु॑भी रुद्रैर्द॒धीरैः॑ कर्म॒ण्यां॑ मृदं॑ ।

हस्ता॑भ्यां मृद्वीं॑ कृत्वा॑ सिनी॒वाली॑ करोतु - [] 19

TS 4.1.5.2 - Padam

सꣳसृ॒ज्येति॑ सं - सृ॒ज्य । पृ॒थि॒वीम् । भू॒मिम् । च । ज्योति॑षा ।

सह ॥ सुजा॑तमि॒ति सु - जा॒तम् । जा॒तवे॑दसमि॒ति जा॒त-वे॑दसम् ।

अ॒ग्निम् । वै॒श्वान॑रम् । वि॒भुमि॑ति वि - भुम् ॥ अ॒यक्ष्मा॑य । त्वा ।

समि॑ति । सृ॒जामि॑ । प्र॒जाभ्य॑ इति प्र-जाभ्यः ॥ विश्वे॑ । त्वा । दे॒वाः ।

वै॒श्वान॑राः । समि॑ति । सृ॒जन्तु॑ । आ॒नुष्टु॑भेनेत्या॒नु-स्तु॑भेन । छन्द॑सा ।

अ॒ङ्गिर॑स्वत् ॥ रु॒द्राः । सं॒भृत्ये॑ति सं - भृत्य॑ । पृ॒थि॒वीम् । बृ॒हत् ।

ज्योतिः॑ । समि॑ति । ई॒धिरे॑ ॥ तेषा॑म् । भानुः॑ । अज॑स्रः । इत् ।

शु॒क्रः । दे॒वेषु॑ । रोच॑ते ॥ सꣳसृष्टा॑मि॒ति सं - सृष्टा॑म् । वसु॑भिरि॒ति

वसु॑ - भिः । रु॒द्रैः । धी॒रैः । कर्म॒ण्याम् । मृद॑म् ॥ हस्ता॑भ्याम् ।

मृद्वी॑म् । कृत्वा॑ । सिनी॒वाली॑ । करोतु॑ । 19 (50)

TS 4.1.5.3

तां ॥

सिनी॒वाली॒ सु॒क॒पर्दा॒ सु॒कुरी॒रा स्वौ॒प॒शा ।

सा तु॒भ्यम॑दि॒ते मह॒ ओ॒खां द॑धातु ह॒स्तयोः॑ ॥

उ॒खां करो॑तु श॒क्त्या बा॒हुभ्या॒-म॑दि॒तिर्दि॒र्धया॑ ।

मा॒ता पु॒त्रं य॑थो॒प॒स्थे सा॒ऽग्निं बि॑भर्तु गर्भ॒ आ ॥

म॒खस्य॑ शिरो॒ऽसि य॒ज्ञस्य॑ प॒दे स्थः॑ ।

वस॑वस्त्वा कृ॒ण्वन्तु॑ गा॒य॒त्रेण॒ छन्द॑सा ऽङ्गि॒रस्व॑त् पृ॒थिव्य॑सि

रु॒द्रास्त्वा कृ॒ण्वन्तु॑ त्रै॒ष्टुभे॑न छन्द॑सा ऽङ्गि॒रस्व॑दन्त॒रिक्ष॑मस्या – [] 20

TS 4.1.5.3 - Padam

ताम् ॥ सि॒नी॒वा॒ली । सु॒क॒पर्दे॑ति सु – क॒पर्दा॒ । सु॒कुरी॒रेति॑

सु – कुरी॒रा । स्वौ॒प॒शेति॑ सु – औ॒प॒शा ॥ सा । तु॒भ्यम् । अ॒दि॒ते ।

म॒हे । ए॒ति । उ॒खाम् । द॒धातु॑ । ह॒स्तयोः॑ ॥ उ॒खाम् । क॒रोतु॑ ।

श॒क्त्या । बा॒हुभ्या॒मिति॑ बा॒हु – भ्याम् । अ॒दि॒तिः । धि॒या ॥ मा॒ता ।

पु॒त्रम् । य॒था । उ॒प॒स्थ इ॒त्युप॑-स्थे । सा । अ॒ग्निम् । बि॒भर्तु॑ ।

ग॒र्भे॑ । आ ॥ म॒खस्य॑ । शि॒रः । अ॒सि । य॒ज्ञस्य॑ । प॒दे इति॑ । स्थः॑ ॥
व॒सवः॑ । त्वा । कृ॒ण्वन्तु॑ । गा॒य॒त्रेण॑ । छ॒न्दसा॑ । अ॒ङ्गिर॒स्वत् ।
पृ॒थि॒वी । अ॒सि । रु॒द्राः । त्वा । कृ॒ण्वन्तु॑ । त्रै॒ष्टु॒भेन॑ । छ॒न्दसा॑ ।
अ॒ङ्गिर॒स्वत् । अ॒न्तरि॑क्षम् । अ॒सि । 20 (50)

TS 4.1.5.4

-दि॒त्यास्त्वा॑ कृ॒ण्वन्तु॑ जा॒गते॑न छ॒न्दसा॑ऽङ्गिर॒स्वद् द्यौ॑र॒सि वि॒श्वे॑
त्वा दे॒वा वै॒श्वान॑राः कृ॒ण्वन्त्वा॑नु॒ष्टु॒भेन॑ छ॒न्दसा॑-ऽङ्गिर॒स्वद्-दि॒शोऽसि॑
ध्रु॒वाऽसि॑ धा॒रया॑ म॒यि प्र॒जाꣳ रा॒यस्पोषं॑ गौ॒पत्यꣳ सु॒वीर्यꣳ स॒जा॒तान्
य॒ज॒मा॒नाया॑ऽदि॒त्यै रा॒स्नाऽस्य॑ दि॒तिस्ते॑ बि॒लं गृ॑ह्णातु पा॒ङ्केन॑
छ॒न्दसा॑ ऽङ्गिर॒स्वत् ॥

कृ॒त्वाय॑ सा म॒हीमु॒खां मृ॒न्मयीं॑ यो॒निम॒ग्नये॑ ।
तां पु॒त्रेभ्यः॑ सं प्रा () य॒च्छद॑दि॒तिः श्र॒पया॑निति ॥ 21

TS 4.1.5.4 - Padam

आ॒दि॒त्याः । त्वा । कृ॒ण्वन्तु॑ । जा॒गते॑न । छ॒न्दसा॑ । अ॒ङ्गिर॒स्वत् ।
द्यौः । अ॒सि । वि॒श्वे॑ । त्वा । दे॒वाः । वै॒श्वान॑राः । कृ॒ण्वन्तु॑ ।

आ॒नु॒ष्टु॒भे॒ने॒त्या॒नु॒ – स्तु॒भे॒न॒ । छ॒न्द॒सा॒ । अ॒ङ्गि॒र॒स्व॒त् । दि॒शः॑ । अ॒सि॒ ।
 ध्रु॒वा॒ । अ॒सि॒ । धा॒रय॑ । म॒यि॑ । प्र॒जा॒मि॒ति॑ प्र॒-जा॒म् । रा॒यः॑ । पो॒षम्॑ ।
 गौ॒प॒त्यम्॑ । सु॒वी॒र्य॒मि॒ति॑ सु॒ – वी॒र्य॑म् । स॒जा॒ता॒नि॒ति॑ स॒ – जा॒तान्॑ ।
 यज॑मा॒नाय॑ । अ॒दि॒त्यै॑ । रा॒स्ना॑ । अ॒सि॒ । अ॒दि॒तिः॑ । ते॒ । बि॒लम्॑ ।
 गृ॒ह्णा॒तु॒ । पा॒ङ्के॒न॑ । छ॒न्द॒सा॒ । अ॒ङ्गि॒र॒स्व॒त् ॥ कृ॒त्वा॒य॑ । सा॒ । म॒ही॒म् ।
 उ॒खाम्॑ । मृ॒न्म॒यी॒मि॒ति॑ मृ॒त्-म॒यी॒म् । यो॒नि॒म् । अ॒ग्नयै॑ ॥ ता॒म् ।
 पु॒त्रे॒भ्यः॑ । स॒म् । प्रे॒ति॑ () । अ॒य॒च्छ॒त् । अ॒दि॒तिः॑ । श्र॒प॒यान्॑ ।
 इति॑ ॥ 21 (54)

(मि॒त्रः – क॒रो – त्व॒न्तरि॑क्ष॒मसि॑ – प्र – च॒त्वारि॑ च) (A5)

TS 4.1.6.1

व॒स॒व॒स्त्वा॒ धू॒प॒य॒न्तु॒ गा॒य॒त्रे॒ण॒ छ॒न्द॒सा॒ङ्गि॒र॒स्व॒द्-रु॒द्रा॒स्त्वा॒ धू॒प॒य॒न्तु॒
 त्रै॒ष्टु॒भे॒न॒ छ॒न्द॒सा॒ङ्गि॒र॒स्व॒-दा॒दि॒त्या॒स्त्वा॒ धू॒प॒य॒न्तु॒ जा॒ग॒ते॒न॒
 छ॒न्द॒सा॒ङ्गि॒र॒स्व॒द्-वि॒श्वे॑ त्वा॒ दे॒वा॒ वै॒श्वान॑रा॒ धू॒प॒य॒न्त्वा॒नु॒ष्टु॒भे॒न॒
 छ॒न्द॒सा॒ङ्गि॒र॒स्व॒-दि॒न्द्र॒स्त्वा॒ धू॒प॒य॒त्व॒ङ्गि॒र॒स्व॒द्-वि॒ष्णु॑स्त्वा॒
 धू॒प॒य॒त्व॒ङ्गि॒र॒स्व॒द्-व॒रु॒ण॒स्त्वा॒ धू॒प॒य॒त्व॒ङ्गि॒र॒स्व॒-द॒दि॒ति॒स्त्वा॒ दे॒वी॒

वि॒श्व॑दे॒व्या॒वती॑ पृ॒थि॒व्याः स॒ध॒स्थे॑ऽङ्गि॒र॒स्वत् ख॑न॒त्वव॑ट

दे॒वानां॑ त्वा प॒त्नी॑ – [] 22

TS 4.1.6.1 - Padam

व॒स॒वः । त्वा । धू॒प॒य॒न्तु । गा॒य॒त्रेण॑ । छ॒न्द॒सा । अ॒ङ्गि॒र॒स्वत् ।

रु॒द्राः । त्वा । धू॒प॒य॒न्तु । त्रै॒ष्टु॒भेन॑ । छ॒न्द॒सा । अ॒ङ्गि॒र॒स्वत् ।

आ॒दि॒त्याः । त्वा । धू॒प॒य॒न्तु । जा॒ग॒तेन॑ । छ॒न्द॒सा । अ॒ङ्गि॒र॒स्वत् ।

वि॒श्वे॑ । त्वा । दे॒वाः । वै॒श्वान॑राः । धू॒प॒य॒न्तु ।

आ॒नु॒ष्टु॒भेने॒त्यानु॑ – स्तु॒भेन॑ । छ॒न्द॒सा । अ॒ङ्गि॒र॒स्वत् । इ॒न्द्रः । त्वा ।

धू॒प॒य॒तु । अ॒ङ्गि॒र॒स्वत् । वि॒ष्णुः । त्वा । धू॒प॒य॒तु । अ॒ङ्गि॒र॒स्वत् ।

व॒रु॒णः । त्वा । धू॒प॒य॒तु । अ॒ङ्गि॒र॒स्वत् । अ॒दि॒तिः । त्वा । दे॒वी ।

वि॒श्व॑दे॒व्या॒वती॑ति॒ वि॒श्व॑दे॒व्य – व॒ती । पृ॒थि॒व्याः । स॒ध॒स्थ इति॑

स॒ध – स्थे॑ । अ॒ङ्गि॒र॒स्वत् । ख॒न॒तु । अ॒व॒ट । दे॒वाना॑म् । त्वा ।

प॒त्नीः । 22 (50)

TS 4.1.6.2

दे॒वी वि॒श्वदे॒व्यावतीः॑ पृ॒थिव्याः स॒धस्थे॑ऽङ्गिर॒स्वद्-द॑धतू॒खे
धिष॑णास्त्वा दे॒वीवि॒श्वदे॒व्यावतीः॑ पृ॒थिव्याः स॒धस्थे॑-ऽङ्गिर॒स्व-
दभी॑न्धतामु॒खे ग्नास्त्वा॑ दे॒वीवि॒श्वदे॒व्यावतीः॑ पृ॒थिव्याः
स॒धस्थे॑ऽङ्गिर॒स्व-च्छ्र॑पयन्तू॒खे वरू॑त्रयो॒ जनय॑स्त्वा
दे॒वीवि॒श्वदे॒व्यावतीः॑ पृ॒थिव्याः स॒धस्थे॑ऽङ्गिर॒स्वत् प॑चन्तू॒खे ।
मित्रै॑तामु॒खां प॑चैषा मा भेदि ।
एतां॑ ते परि द॒दाम्य॑भित्त्यै ॥

अभी॒मां – [] 23

TS 4.1.6.2 - Padam

दे॒वीः । वि॒श्वदे॒व्यावती॑रिति वि॒श्वदे॒व्य - वतीः॑ । पृ॒थिव्याः ।
स॒धस्थ॑ इति स॒ध - स्थे॑ । अ॒ङ्गिर॒स्वत् । द॒धतु॑ । उ॒खे । धिष॑णाः ।
त्वा । दे॒वीः । वि॒श्वदे॒व्यावती॑रिति वि॒श्वदे॒व्य - वतीः॑ । पृ॒थिव्याः ।
स॒धस्थ॑ इति स॒ध - स्थे॑ । अ॒ङ्गिर॒स्वत् । अभी॑ति । इ॒न्धता॑म् ।
उ॒खे । ग्नाः॑ । त्वा । दे॒वीः । वि॒श्वदे॒व्यावती॑रिति वि॒श्वदे॒व्य - वतीः॑ ।

पृ॒थि॒व्याः । स॒ध॒स्थ॒ इति॑ स॒ध – स्थे॑ । अ॒ङ्गि॒र॒स्वत् । श्र॒प॒य॒न्तु॒ ।
उ॒खे ॥ व॒रू॒त्र॒यः । ज॒न॒यः । त्वा । दे॒वीः । वि॒श्व॒दे॒व्या॒वती॑रिति॑
वि॒श्व॒दे॒व्य – वतीः॑ । पृ॒थि॒व्याः । स॒ध॒स्थ॒ इति॑ स॒ध – स्थे॑ ।
अ॒ङ्गि॒र॒स्वत् । प॒च॒न्तु॒ । उ॒खे ॥ मि॒त्र । ए॒ताम् । उ॒खाम् । प॒च ।
ए॒षा । मा । भे॒दि ॥ ए॒ताम् । ते । प॒री॒ति । द॒दामि॑ । अ॒भि॒त्यै ॥
अ॒भी॒ति । इ॒माम् । 23 (50)

TS 4.1.6.3

म॒हि॒ना दि॒वं मि॒त्रो ब॒भूव॑ स॒प्र॒थाः ।
उ॒त श्र॒व॒सा पृ॒थि॒वीं ॥
मि॒त्र॒स्य॑ च॒र्ष॒णी॒धृ॒तः श्र॒वो दे॒व॒स्य॑ सा॒न॒सिं ।
द्यु॒म्नं चि॒त्र॒श्र॒व॒स्त॒मं ॥
दे॒व॒स्त्वा स॒वि॒तो॒द्व॒प॒तु सु॒पा॒णिः स्व॒ङ्गु॒रिः ।
सु॒बा॒हु॒रु॒त श॒क्त्या ॥
अ॒प॒द्य॒मा॒ना पृ॒थि॒व्या॒शा दि॒श आ पृ॒ण ।
उ॒त्ति॒ष्ठ बृ॒हती॑ भ॒वो॒र्ध्वा तिष्ठ॑ ध्रु॒वा त्वं ॥

व॒स॒व॒स्त्वा ऽऽ॒च्छृ॒न्दन्तु॑ गाय॒त्रेण॑ छन्द॒साऽङ्गि॒रस्व॑द् रु॒द्रास्त्वाऽऽ
 च्छृ॒न्दन्तु॑ () त्रै॒ष्टु॒भेन॑ छन्द॒साऽङ्गि॒रस्व॑-दादि॒त्यास्त्वा ऽऽ॒च्छृ॒न्दन्तु॑
 जा॒गते॑न छन्द॒साऽङ्गि॒रस्व॑द्-वि॒श्वे॑ त्वा दे॒वा वै॒श्वान॑रा आ
 च्छृ॒न्दन्त्वा॑नु॒ष्टु॒भेन॑ छन्द॒साऽङ्गि॒रस्व॑त् ॥ 24

TS 4.1.6.3 - Padam

म॒हि॒ना । दि॒वम् । मि॒त्रः । ब॒भू॒व । स॒प्र॒था इति॑ स – प्र॒थाः ॥ उ॒त ।
 श्र॒व॒सा । पृ॒थि॒वीम् ॥ मि॒त्रस्य॑ । च॒र्ष॒णी॒धृत॑ इति॑ च॒र्ष॒णि – धृ॒तः ।
 श्र॒वः । दे॒वस्य॑ । सा॒न॒सिम् ॥ द्यु॒म्नम् । चि॒त्रश्र॑वस्तममि॒ति
 चि॒त्रश्र॑वः – त॒मम् ॥ दे॒वः । त्वा । स॒वि॒ता । उ॒दि॒ति । व॒प॒तु ।
 सु॒पा॒णि॒रिति॑ सु – पा॒णिः । स्व॒ङ्गु॒रिति॑ सु – अ॒ङ्गु॒रिः ॥ सु॒बा॒हु॒रिति॑
 सु – बा॒हुः । उ॒त । श॒क्त्या ॥ अ॒प॒द्य॒मा॒ना । पृ॒थि॒वि । आ॒शाः ।
 दि॒शः । ए॒ति । पृ॒ण ॥ उ॒दि॒ति । ति॒ष्ठ । बृ॒ह॒ती । भ॒व । ऊ॒र्ध्वा ।
 ति॒ष्ठ । ध्रु॒वा । त्वम् ॥ व॒स॒वः । त्वा । ए॒ति । छृ॒न्दन्तु॑ । गा॒य॒त्रेण॑ ।
 छन्द॒सा । अ॒ङ्गि॒रस्व॑त् । रु॒द्राः । त्वा । ए॒ति । छृ॒न्दन्तु॑ () । त्रै॒ष्टु॒भेन॑ ।

छ॒न्द॒सा । अ॒ङ्गि॒र॒स्वत् । आ॒दि॒त्याः । त्वा । ए॒ति । छृ॒न्द॒न्तु ।
जा॒ग॒तेन । छ॒न्द॒सा । अ॒ङ्गि॒र॒स्वत् । वि॒श्वे॑ । त्वा । दे॒वाः । वै॒श्वान॒राः ।
ए॒ति । छृ॒न्द॒न्तु । आ॒नु॒ष्टु॒भेने॒त्यानु॑ – स्तु॒भेन॑ । छ॒न्द॒सा ।

अ॒ङ्गि॒र॒स्वत् ॥ 24 (69) (प॒त्नी – रि॒माꣳ – रु॒द्रास्त्वाꣳ छृ॒न्द॒न्त्वे –
का॒न्न वि॒श्व॑ति॒श्च) (A6)

TS 4.1.7.1

स॒मास्त्वाꣳग्न॑ ऋ॒तवो॑ व॒र्धय॑न्तु सँव॒थ्स॒रा ऋ॒षयो॑ या॒नि स॒त्या ।
सं दि॒व्येन॑ दी॒दिहि॑ रो॒चने॑न वि॒श्वा आ भा॑हि प्र॒दिशः॑ पृ॒थि॒व्याः ॥
सं चे॒द्ध्य॒स्वाꣳग्ने॑ प्र च बो॒धयै॑नमु॒च्च तिष्ठ॑ म॒हते॑ सौ॒भगा॑य ।
मा च रि॒षदु॑प॒सत्ता॑ ते अ॒ग्ने ब्र॒ह्माण॑स्ते य॒शसः॑ स॒न्तु माꣳन्ये॑ ॥
त्वा॒म॒ग्ने वृ॑णते ब्रा॒ह्म॒णा इ॒मे शि॒वो अ॒ग्ने – [] 25

TS 4.1.7.1 - Padam

स॒माः । त्वा । अ॒ग्ने । ऋ॒तवः॑ । व॒र्धय॑न्तु । सँव॒थ्स॒रा इति॑
सं-व॒थ्स॒राः । ऋ॒षयः॑ । या॒नि । स॒त्या ॥ स॒मि॒ति । दि॒व्येन॑ । दी॒दिहि॑ ।
रो॒चने॑न । वि॒श्वाः । ए॒ति । भा॑हि । प्र॒दिश॑ इति प्र – दि॒शः ।

पृ॒थि॒व्याः ॥ स॒मि॒ति॑ । च॒ । इ॒द्ध्य॒स्व॑ । अ॒ग्ने॑ । प्रे॒ति॑ । च॒ । बो॒ध॒य॒ ।
ए॒न॒म् । उ॒दि॒ति॑ । च॒ । ति॒ष्ठ॒ । म॒ह॒ते॒ । सौ॒भ॒गा॒य॒ ॥ मा॒ । च॒ । रि॒ष॒त् ।
उ॒प॒स॒त्ते॒त्यु॒प॒ – स॒त्ता॒ । ते॒ । अ॒ग्ने॑ । ब्र॒ह्मा॒णः॑ । ते॒ । य॒श॒सः॑ । स॒न्तु॒ ।
मा॒ । अ॒न्ये॑ ॥ त्वा॒म् । अ॒ग्ने॑ । वृ॒ण॒ते॒ । ब्रा॒ह्म॒णाः॑ । इ॒मे॒ । शि॒वः॑ ।

अ॒ग्ने॑ । 25 (50)

TS 4.1.7.2

सं॑ व॒रणे॑ भ॒वा नः॑ ।

स॒प॒त्न॒हा नो॑ अ॒भि॒मा॒ति॒जि॒च्च॒ स्वे॒ गये॑ जा॒गृ॒ह्य प्र॑युच्छन् ॥

इ॒है॒वा॒ग्ने॑ अ॒धि॒ धा॒र॒या र॒यिं॑ मा॒ त्वा नि॒क्रन्॑ पू॒र्व॒चि॒तो॑ नि॒का॒रि॒णः॑ ।

क्ष॒त्र॒म॒ग्ने॑ सु॒य॒म॒म॒स्तु॒ तु॒भ्य॑मु॒प॒स॒त्ता व॑र्द्धतां ते॒ अ॒नि॒ष्टृ॒तः॑ ॥

क्ष॒त्रे॒णा॒ग्ने॑ स्वा॒युः स॒ꣳ र॑भ॒स्व मि॒त्रे॒णा॒ग्ने॑ मि॒त्र॒धे॒ये॑ य॒त॒स्व॒ ।

स॒जा॒ता॒नां॑ म॒द्ध्य॒म॒स्था॑ ए॒धि॒ रा॒ज्ञा॑म॒ग्ने॑ वि॒ह॒व्यो॑ दी॒दि॒ही॒ह॒ ॥

अ॒ति॒ – [] 26

TS 4.1.7.2 - Padam

सँ॑वर॒ण इति॑ सं – वर॑णे । भव॑ । नः॑ ॥ स॒प॒न्न॒हेति॑ स॒प॒न्न॒-हा । नः॑ ।
अ॒भि॒मा॒ति॒जि॒दि॒त्य॒भि॒मा॒ति – जि॒त् । च॒ । स्वे॑ । ग॒यै॑ । जा॒गृ॒हि ।
अ॒प्र॒यु॒च्छ॒न्नित्य॑प्र – यु॒च्छ॒न् ॥ इ॒ह । ए॒व । अ॒ग्ने॑ । अधी॑ति । धा॒र॒य ।
र॒यि॒म् । मा॒ । त्वा॒ । नी॒ति । क्र॒न् । पू॒र्व॒चि॒त इति॑ पू॒र्व – चि॒तः ।
नि॒का॒रि॒ण इति॑ नि – का॒रि॒णः ॥ क्ष॒त्र॒म् । अ॒ग्ने॑ । सु॒य॒म॒मि॒ति
सु – य॒म॒म् । अ॒स्तु॒ । तु॒भ्य॒म् । उ॒प॒स॒त्ते॒त्यु॒प-स॒त्ता । व॒र्द्ध॒ता॒म् ।
ते॒ । अ॒नि॒ष्ट॒तः ॥ क्ष॒त्रे॒ण । अ॒ग्ने॑ । स्वा॒यु॒रि॒ति सु – आ॒युः॑ । स॒मि॒ति ।
र॒भ॒स्व । मि॒त्रे॒ण । अ॒ग्ने॑ । मि॒त्र॒धे॒य इति॑ मि॒त्र – धे॒यै॑ । य॒त॒स्व ॥
स॒जा॒ता॒ना॒मि॒ति स – जा॒ता॒ना॒म् । म॒द्ध्य॒म॒स्था इति॑ म॒द्ध्य॒म-स्थाः॑ ।
ए॒धि । रा॒ज्ञा॒म् । अ॒ग्ने॑ । वि॒ह॒व्य इति॑ वि – ह॒व्यः॑ । दी॒दि॒हि । इ॒ह ॥
अ॒ती॒ति । 26 (50)

TS 4.1.7.3

नि॒हो॒ अ॒ति॒ सि॒धो ऽत्य॑चि॒त्ति-म॒त्य॒रा॒ति॒म॒ग्ने॑ ।
वि॒श्वा॒ ह्य॒ग्ने॑ दु॒रि॒ता स॒ह॒स्वा॒था॒स्म॒भ्यꣳ स॒ह॒वी॒राꣳ र॒यि॒न्दाः॑ ॥

अ॒ना॒धृ॒ष्यो जा॒तवे॒दा॒ अनि॑ष्ट॒तो वि॒राड॑ग्ने क्ष॒त्रभृ॑द्-दी॒दिही॑ह ।
वि॒श्वा आ॒शाः प्र॒मुञ्च॑न् मानु॒षीर्भियः॑ शि॒वाभि॑र॒द्य परि॑ पा॒हि नो वृ॒धे ॥
बृ॒हस्प॑ते स॒वित॑र्बो॒धयै॑न॒ऽ स॒ऽशितं॑ चि॒त्सं त॒रा॒ऽ स॒ऽ शि॒शाधि॑ ।
व॒र्धयै॑नं म॒हते॑ सौ॒भगा॑य- [] 27

TS 4.1.7.3 - Padam

नि॒हः । अ॒तीति॑ । सि॒धः । अ॒तीति॑ । अ॒चित्ति॑म् । अ॒तीति॑ । अ॒राति॑म् ।
अ॒ग्ने ॥ वि॒श्वा । हि । अ॒ग्ने । दु॒रिते॑ति दुः - इ॒ता । स॒हस्व॑ ।
अथ॑ । अ॒स्मभ्य॑मि॒त्यस्म॑ - भ्य॒म् । स॒हवी॑रामि॒ति स॒ह - वी॒राम् ।
रयि॑म् । दाः ॥ अ॒ना॒धृ॒ष्य इत्य॑ना - धृ॒ष्यः । जा॒तवे॒दा इति॑
जा॒त - वे॒दाः । अनि॑ष्ट॒तः । वि॒राडि॑ति वि - राट् । अ॒ग्ने ।
क्ष॒त्रभृ॑दि॒ति क्ष॒त्र - भृ॒त् । दी॒दिहि॑ । इ॒ह ॥ वि॒श्वाः । आ॒शाः ।
प्र॒मुञ्च॑न्निति॒ प्र - मु॒ञ्चन् । मानु॒षीः । भि॒यः । शि॒वाभिः॑ । अ॒द्य ।
प॒रीति॑ । पा॒हि । नः । वृ॒धे ॥ बृ॒हस्प॑ते । स॒वितः॑ । बो॒धय॑ । ए॒नम् ।

सञ्शितमिति सं – शितम् । चित् । संतरामिति सं – तराम् ।
समिति । शिशधि ॥ वर्धय । एनम् । महते । सौभगाय । 27 (50)

TS 4.1.7.4

विश्व एनमनु मदन्तु देवाः ॥

अमुत्रभूयादध यद्यमस्य बृहस्पते अभिशस्तेर मुञ्चः ।
प्रत्यौहता-मश्विना मृत्युमस्माद् देवाना-मग्ने भिषजा शचीभिः ॥
उद्वयं तमसस्परि पश्यन्तो ज्योतिरुत्तरं ।
देवं देवत्रा सूर्यमगन्म ज्योतिरुत्तमं ॥ 28

TS 4.1.7.4 - Padam

विश्वे ॥ एनम् । अन्विति । मदन्तु । देवाः ॥
अमुत्रभूयादित्यमुत्र – भूयात् । अध । यत् । यमस्य । बृहस्पते ।
अभिशस्तेरित्यभि – शस्तेः । अमुञ्चः ॥ प्रतीति । औहताम् ।
अश्विना ॥ मृत्युम् । अस्मात् । देवानाम् । अग्ने । भिषजा ॥
शचीभिरिति शचि – भिः ॥ उदिति । वयम् । तमसः । परीति ।
पश्यन्तः । ज्योतिः । उत्तरमित्युत् – तरम् ॥

दे॒वम् । दे॒व॒त्रेति॑ दे॒व – त्रा । सूर्य॑म् । अ॒ग॒न्म । ज्योतिः॑ ।

उ॒त्त॒म॒मि॒त्युत् – त॒मम् ॥ 28 (34) (इ॒मे शि॒वो अ॒ग्ने – ऽति –

सौ॒भगा॑य – च॒तु॒स्त्रि॑ञ्च) (A7)

TS 4.1.8.1

ऊ॒र्ध्वा अ॒स्य स॒मिधो॑ भवन्त्यू॒र्ध्वा शु॒क्रा शो॒ची॒ष्य॒ग्नेः ।

द्यु॒म॒त्त॒मा सु॒प्र॒ती॒क॒स्य सू॒नोः ॥

त॒नू॒न॒पा॒द॒सु॒रो वि॒श्व॒वे॒दा दे॒वो दे॒वेषु॑ दे॒वः ।

प॒थ आ॒ऽन॒क्ति म॒ध्वा घृ॒तेन॑ ॥

म॒ध्वा य॒ज्ञं न॒क्ष॒से प्री॒णानो॑ न॒रा॒श॒सो अ॒ग्ने ।

सु॒कृ॒द्दे॒वः स॒वि॒ता वि॒श्व॒वारः॑ ॥

अ॒च्छा॒य॒मेति॑ श॒व॒सा घृ॒तेने॑डा॒नो वह्नि॑र्न॒म॒सा ।

अ॒ग्नि॒ः स्रु॒चो अ॒ध्व॒रेषु॑ प्र॒य॒थ्सु॑ ॥

स य॒क्ष॒द॒स्य म॒हि॒मान॑म॒ग्नेः स – [] 29

TS 4.1.8.1 - Padam

ऊ॒र्ध्वाः । अ॒स्य । स॒मि॒ध इति॑ सं-इ॒धः । भ॒वन्ति॑ । ऊ॒र्ध्वा ।
शु॒क्रा । शो॒ची॒षि । अ॒ग्नेः ॥ द्यु॒मत्त॑मेति॑ द्यु॒मत् - त॒मा ।
सु॒प्र॒ती॒क॒स्येति॑ सु - प्र॒ती॒क॒स्य । सू॒नोः ॥ त॒नू॒नपा॑दिति॑ त॒नू-न॑पात् ॥
अ॒सुरः । वि॒श्ववे॑दा इति॑ वि॒श्व-वे॑दाः । दे॒वः । दे॒वेषु॑ । दे॒वः ॥ प॒थः ।
एति॑ । अ॒न॒क्ति॒ । म॒द॒ध्वा ॥ घृ॒तेन॑ ॥ म॒द॒ध्वा ॥ य॒ज्ञम् । न॒क्ष॒से ।
प्री॒णा॒नः । न॒रा॒श॒सः । अ॒ग्ने ॥ सु॒कृ॒दि॒ति सु - कृ॒त् । दे॒वः ।
स॒वि॒ता । वि॒श्ववा॑र इति॑ वि॒श्व - वा॒रः ॥ अ॒च्छ । अ॒यम् । एति॑ ।
श॒व॒सा । घृ॒तेन॑ । ई॒डा॒नः । व॒ह्निः । न॒म॒सा ॥ अ॒ग्निम् । स्रु॒चः ।
अ॒ध्व॒रेषु॑ । प्र॒य॒त्स्वि॒ति प्र॒यत् - सु ॥ सः । य॒क्ष॒त् । अ॒स्य ।
म॒हि॒मा॒नम् ॥ अ॒ग्नेः । सः । 29 (50)

TS 4.1.8.2

ई॒ म॒न्द्रा॒सु प्र॒य॒सः ।
व॒सु॒श्चेति॑ष्ठो व॒सु॒धा॒त॒मश्च॑ ॥
द्वा॒रो दे॒वी॒र॒न्व॒स्य वि॒श्वे॑ व्र॒ता द॑दन्ते॑ अ॒ग्नेः ।

उ॒रु॒व्य॒च॒सो॑ धा॒म्ना॑ प॒त्य॒मा॒नाः॑ ॥

ते अ॒स्य॑ योष॒णे दि॒व्ये॑ न यो॒ना॒वु॒षा॒सा॒न॒क्ता॑ ॥

इ॒मं य॑ज्ञ॒म॒व॒ता म॒द॒ध्व॒रं नः॑ ॥

दै॒व्या॑ हो॒ता॒रा॒वू॒र्ध्व॒-म॒द॒ध्व॒रं नो॒ऽग्ने॑र्जि॒ह्वा॒म॒भि गृ॑णी॒तं ।

कृ॒णु॒तं नः॑ स्वि॒ष्टिं ॥

ति॒स्रो दे॒वीर्ब॒र्-हि॒रेद॑-स॒द॒न्वि॒डा॒ सर॑स्वती- [] 30

TS 4.1.8.2 - Padam

ई॒म् । म॒न्द्रा॒सु॑ । प्र॒य॒सः॑ ॥ व॒सुः॑ । चे॒ति॒ष्ठः॑ । व॒सु॒धा॒त॒म॒ इति॑

व॒सु - धा॒त॒मः॑ । च ॥ द्वा॒रः॑ । दे॒वीः॑ । अ॒न्वि॒ति॑ । अ॒स्य॑ । वि॒श्वे॑ ॥

व्र॒ता । द॒द॒न्ते॑ । अ॒ग्नेः॑ ॥ उ॒रु॒व्य॒च॒स इ॒त्यु॒रु - व्य॒च॒सः॑ । धा॒म्ना॑ ।

प॒त्य॒मा॒नाः॑ ॥ ते इति॑ । अ॒स्य॑ । योष॒णे इति॑ । दि॒व्ये इति॑ । न । यो॒नौ॑ ॥

उ॒षा॒सा॒न॒क्ता॑ ॥ इ॒मम् । य॒ज्ञम् । अ॒व॒ता॒म् । अ॒द॒ध्व॒रम् । नः॑ ॥ दै॒व्या॑ ।

हो॒ता॒रौ । ऊ॒र्ध्व॒म् । अ॒द॒ध्व॒रम् । नः॑ । अ॒ग्नेः॑ । जि॒ह्वा॒म् । अ॒भी॒ति॑ ।

गृणी॒तम् ॥ कृ॒णु॒तम् । नः । स्वि॒ष्टि॒मि॒ति सु॒-इ॒ष्टिम् ॥ ति॒स्रः । दे॒वीः ।
ब॒र्हिः । ए॒ति । इ॒दम् । स॒दन्तु॒ । इ॒डा । स॒रस्व॒ती । 30 (50)

TS 4.1.8.3

भा॒रती॒ ।

म॒ही गृ॒णा॒ना ॥

तन्न॑स्तु॒रीप॒मद्भु॑तं पु॒रुक्षु॑ त्व॒ष्टा सु॒वीरं॑ ॥

रा॒यस्पोषं॑ वि॒ष्यतु॑ ना॒भि॒मस्मे ॥

व॒नस्प॑तेऽव॒ सृ॒जा र॒रा॒णस्त्म॑ना॒ दे॒वेषु॑ ।

अ॒ग्नि॒र्ह॒व्यं श॑मि॒ता सू॑द॒याति ॥

अ॒ग्ने स्वा॑हा कृ॒णु॒हि जा॑तवे॒द इ॒न्द्राय॑ ह॒व्यं ।

वि॒श्वे दे॒वा ह॒वि॒रि॒दं जु॑ष॒न्तां ॥

हि॒र॒ण्य॒ग॒र्भः स॑म॒व॒र्त॒ता॒ग्रे भू॒तस्य॑ जा॒तः प॒ति॒रेक॑ आसीत् ।

स दा॑धा॒र पृ॒थि॒वीं द्या॑ – [] 31

TS 4.1.8.3 - Padam

भार॑ती ॥ म॒ही । गृ॒णा॒ना ॥ तत् । नः । तु॒री॒पम् । अ॒द्भु॑तम् । पु॒रु॒क्षु ।
त्वष्टा॑ । सु॒वी॒र॒मि॒ति सु – वी॒रम् ॥ रा॒यः । पो॒षम् । वी॒ति । स्य॒तु ।
नाभि॑म् । अ॒स्मे इति॑ ॥ वन॑स्पते । अवे॑ति । सृ॒ज । ररा॑णः । त्मना॑ ।
दे॒वेषु॑ ॥ अ॒ग्निः । ह॒व्यम् । श॒मि॒ता । सू॒द॒या॒ति ॥ अ॒ग्ने । स्वा॒हा ।
कृ॒णु॒हि । जा॒त॒वे॒द इति॑ जा॒त – वे॒दः । इन्द्रा॑य । ह॒व्यम् ॥ वि॒श्वे ।
दे॒वाः । ह॒विः । इ॒दम् । जु॒षन्ता॑म् ॥ हि॒र॒ण्य॒ग॒र्भ इति॑ हि॒र॒ण्य॒ग॒र्भः ।
स॒मि॒ति । अ॒व॒र्त॒त । अ॒ग्रे । भू॒त॒स्य । जा॒तः । प॒तिः । ए॒कः ।
आ॒सी॒त् ॥ सः । दा॒धा॒र । पृ॒थि॒वी॒म् । द्याम् । 31 (50)

TS 4.1.8.4

–मु॒ते॒मां क॒स्मै दे॒वाय॑ ह॒विषा॑ वि॒धेम ॥
यः प्रा॑णतो नि॒मिष॑तो म॒हि॒त्वै॒क इ॒द्रा॒जा जग॑तो ब॒भूव॑ ।
य ई॒शे अ॒स्य द्वि॒प॒दश्च॑तु॒ष्प॒दः क॒स्मै दे॒वाय॑ ह॒विषा॑ वि॒धेम ॥
य आ॒त्म॒दा ब॒ल॒दा य॒स्य वि॒श्व उ॒पा॒स॒ते प्र॒शि॒षं य॒स्य दे॒वाः ।

यस्य॑ छा॒याऽमृतं॑ यस्य॑ मृ॒त्युः कस्मै॑ दे॒वाय॑ ह॒विषा॑ वि॒धेम ॥

यस्ये॒मे हि॒मव॑न्तो म॒हित्वा॑ यस्य॑ स॒मुद्र॑ र॒सया॑ स॒हा – [] 32

TS 4.1.8.4 - Padam

उ॒त । इ॒माम् । कस्मै॑ । दे॒वाय॑ । ह॒विषा॑ । वि॒धेम ॥ यः । प्रा॒णत॑ इति॑
प्र – अ॒नतः । नि॒मिष॑त इति॑ नि – मि॒षतः । म॒हित्वे॑ति॑ म॒हि – त्वा ।
ए॒कः । इ॒त् । रा॒जा । ज॒गतः । ब॒भूव ॥ यः । ई॒शे । अ॒स्य ।
द्वि॒पद॑ इति॑ द्वि – प॒दः । च॒तुष्प॑द इति॑ च॒तुः – प॒दः । कस्मै॑ ।
दे॒वाय॑ । ह॒विषा॑ । वि॒धेम ॥ यः । आ॒त्मदा॑ इत्या॒त्म-दाः । ब॒लदा॑ इति॑
ब॒ल-दाः । यस्य॑ । वि॒श्वे । उ॒पास॑त इत्यु॒प – आ॑सते । प्र॒शिष॑मिति॑
प्र – शि॒षम् । यस्य॑ । दे॒वाः ॥ यस्य॑ । छा॒या । अ॒मृत॑म् । यस्य॑ ।
मृ॒त्युः । कस्मै॑ । दे॒वाय॑ । ह॒विषा॑ । वि॒धेम ॥ यस्य॑ । इ॒मे ।
हि॒मव॑न्त इति॑ हि॒म – व॑न्तः । म॒हित्वे॑ति॑ म॒हि – त्वा । यस्य॑ ।
स॒मुद्र॑म् । र॒सया॑ । स॒हा । 32 (50)

TS 4.1.8.5

–ऽऽहुः ।

यस्ये॒माः प्र॒दि॒शो यस्य॑ बा॒हू कस्मै॑ दे॒वाय॑ ह॒विषा॑ वि॒धेम ॥

यं क्र॒न्द॒सी अव॑सा तस्त॒भाने॑ अ॒भ्यैक्षे॑तां॒ मन॑सा रेज॒माने॑ ।

यन्ना॒धि सू॒र उ॒दितौ॑ व्येति॒ कस्मै॑ दे॒वाय॑ ह॒विषा॑ वि॒धेम ॥

येन॑ द्यौ॒रु॒ग्रा पृ॒थि॒वी च दृ॒ढे येन॑ सु॒वः स्त॒भितं॑ येन॑ ना॒कः ।

यो अ॒न्तरि॑क्षे रज॒सो वि॒मानः॑ कस्मै॑ दे॒वाय॑ ह॒विषा॑ वि॒धेम ॥

आपो॑ ह॒ यन्म॑हती वि॒श्व – [] 33

TS 4.1.8.5 - Padam

आ॒हुः ॥ यस्य॑ । इ॒माः । प्र॒दि॒श इति॑ प्र–दि॒शः । यस्य॑ । बा॒हू इति॑ ।

कस्मै॑ । दे॒वाय॑ । ह॒विषा॑ । वि॒धेम ॥ यम् । क्र॒न्द॒सी इति॑ । अव॑सा ।

तस्त॒भाने॑ इति॑ । अ॒भ्यैक्षे॑तामित्य॒भि – ऐक्षे॑तां । मन॑सा । रेज॒माने॑

इति॑ ॥ यत्र॑ । अधी॑ति । सू॒रः । उ॒दिता॑वित्युत् – इ॒तौ । व्येती॑ति

वि – एति॑ । कस्मै॑ । दे॒वाय॑ । ह॒विषा॑ । वि॒धेम ॥ येन॑ । द्यौः । उ॒ग्रा ।

पृ॒थि॒वी । च । दृ॒ढे इति॑ । येन॑ । सु॒वः । स्त॒भितम् । येन॑ । ना॒कः ॥

यः । अ॒न्तरि॑क्षे । रज॑सः । वि॒मान॑ इति वि॒मानः॑ । कस्मै॑ । दे॒वाय॑ ।
ह॒विषा॑ । वि॒धेम॑ ॥ आपः॑ । ह॒ । यत् । म॒हतीः॑ । वि॒श्वम्॑ । 33 (50)

TS 4.1.8.6

–मा॒यन् दक्षं॑ दधा॒ना ज॒नय॑न्तीर॒ग्निं ।

ततो॑ दे॒वानां॑ नि॒र्वर्त॑तासु॒रेकः॑ कस्मै॑ दे॒वाय॑ ह॒विषा॑ वि॒धेम॑ ॥

यश्चि॑दापो म॒हिना॑ प॒र्यप॑श्यद्–दक्षं॑ दधा॒ना ज॒नय॑न्तीर॒ग्निं ।

यो दे॒वेष्व॑धि दे॒व एक॑ आसीत् कस्मै॑ दे॒वाय॑ ह॒विषा॑ वि॒धेम॑ ॥ 34

TS 4.1.8.6 - Padam

आ॒यन् । दक्ष॑म् । दधा॒नाः । ज॒नय॑न्तीः । अ॒ग्निम् ॥ ततः॑ । दे॒वाना॑म् ।
नि॒रिति॑ । अ॒वर्त॑त । अ॒सुः । एकः॑ । कस्मै॑ । दे॒वाय॑ । ह॒विषा॑ । वि॒धेम॑ ॥
यः । चि॒त् । आपः॑ । म॒हिना॑ । प॒र्यप॑श्यदिति॑ परि॒–अप॑श्यत् । दक्ष॑म् ।
दधा॒नाः । ज॒नय॑न्तीः । अ॒ग्निम् ॥ यः । दे॒वेषु॑ । अधी॑ति । दे॒वः ।
एकः॑ । आसी॑त् । कस्मै॑ । दे॒वाय॑ । ह॒विषा॑ । वि॒धेम॑ ॥ 34 (34)

(अ॒ग्नेः स – सर॑स्वती – द्या॑ – सह – वि॒श्वं –
चतु॑स्त्रिं॒शच्च॑) (A8)

Special Korvai for Anuvaakam 29 to 34

(ऊ॒र्ध्वा – यः प्रा॒णतो – य आ॒त्मदा – यस्ये॒मे – यङ्क्र॑न्दसी –
येन॒ द्यौ- रापो॑ ह॒ यत् – ततो॑ दे॒वानां॑ – य॒श्चिदा॒पो – यो दे॒वेषु॑ –
नव॑)

TS 4.1.9.1

आकू॑तिम॒ग्निं प्र॒युज॑ स्वाहा॒ मनो॑ मे॒धाम॒ग्निं प्र॒युज॑ स्वाहा॒
चि॒त्तं वि॒ज्ञात॑म॒ग्निं प्र॒युज॑ स्वाहा॒ वा॒चो वि॒धृति॑म॒ग्निं प्र॒युज॑
स्वाहा॒ प्र॒जाप॑तये॒ मनवे॑ स्वाहा॒ऽग्नये॑ वै॒श्वान॒राय॑ स्वाहा॒ विश्वे॑ दे॒वस्य॑
नेतु॑र्म॒तो वृ॑णीत॒ सख्यं॑ विश्वे॑ रा॒य इ॒षुद्ध्य॑सि द्यु॒म्नं वृ॑णीत॒ पुष्य॑से
स्वाहा॒ मा सु॑ भि॒त्था मा सु॑ रि॒षो दृ॒हस्व॑ वी॒डय॑स्व सु ।
अ॒ंब धृ॑ष्णु वी॒रय॑स्वा – [] 35

TS 4.1.9.1 - Padam

आकू॑तिमि॒त्या – कू॒तिम् । अ॒ग्निम् । प्र॒युज॑मि॒ति प्र – यु॒जम् ।
स्वाहा॑ । मनः॑ । मे॒धाम् । अ॒ग्निम् । प्र॒युज॑मि॒ति प्र-यु॒जम् । स्वाहा॑ ।
चि॒त्तम् । वि॒ज्ञात॑मि॒ति वि – ज्ञा॒तम् । अ॒ग्निम् ।

प्र॒युज॑मि॒ति प्र॒ – युज॑म् । स्वा॒हा॑ । वा॒चः॑ । वि॒धृ॑ति॒मि॒ति वि॒-धृ॑तिम् ।
अ॒ग्नि॑म् । प्र॒युज॑मि॒ति प्र॒ – युज॑म् । स्वा॒हा॑ । प्र॒जाप॑तय॒ इति॑
प्र॒जा – प॒तये॑ । म॒नवे॑ । स्वा॒हा॑ । अ॒ग्नये॑ । वै॒श्वान॑राय॒ । स्वा॒हा॑ ।
वि॒श्वे॑ । दे॒वस्य॑ । ने॒तुः॑ । म॒र्तः॑ । वृ॒णीत॑ । स॒ख्यम्॑ । वि॒श्वे॑ । रा॒यः॑ ।
इ॒षुद्ध्य॑सि । द्यु॒म्नम्॑ । वृ॒णीत॑ । पु॒ष्यसे॑ । स्वा॒हा॑ । मा । स्वि॒ति ।
भि॒त्थाः॑ । मा । स्वि॒ति । रि॒षः॑ । दृ॒ह॑स्व । वी॒डय॑स्व । सु ॥
अ॒ंब । धृ॒ष्णु॑ । वी॒रय॑स्व । 35 (50)

TS 4.1.9.2

–ऽग्नि॑श्चेदं॒ करि॑ष्यथः ॥

दृ॒ह॑स्व दे॒वि पृ॑थि॒वि स्व॒स्तय॑ आ॒सुरी॑ मा॒या स्व॒धया॑ कृ॒ताऽसि॑ ।
जु॒ष्टं दे॒वाना॑मि॒दम॑स्तु ह॒व्यम॑रि॒ष्टा त्व॑मु॒दिहि॑ य॒ज्ञे अ॒स्मिन् ॥
मि॒त्रैता॑मु॒खां तपै॑षा मा भे॒दि ।
ए॒तां ते॒ परि॑ द॒दाम्य॑भि॒त्त्यै ॥
दू॒वन्नः॑ सर्पि॑रा॒सुतिः॑ प्र॒लौ हो॒ता वरे॑ण्यः ।

स॒ह॒स॒स्पु॒त्रो अ॒द्भु॒तः ॥

पर॒स्या॒ अधि॑ सँ॒वतो॑ऽवरा॒ अ॒भ्या – [] 36

TS 4.1.9.2 - Padam

अ॒ग्निः । च । इ॒दम् । क॒रिष्य॑थः ॥ दृ॒ह॒स्व । दे॒वि । पृ॒थि॒वि ।
स्व॒स्तये॑ ॥ आ॒सु॒री । मा॒या । स्व॒धये॑ति स्व – धया॑ ॥ कृ॒ता । अ॒सि ॥
जुष्ट॑म् । दे॒वाना॑म् । इ॒दम् । अ॒स्तु । ह॒व्यम् । अ॒रि॒ष्टा । त्वम् ।
उ॒दि॒ति । इ॒हि । य॒ज्ञे । अ॒स्मिन् ॥ मि॒त्र । ए॒ताम् । उ॒खाम् । तप॑ ।
ए॒षा । मा । भे॒दि ॥ ए॒ताम् । ते । प॒री॒ति । द॒दामि॑ । अ॒भित्यै॑ ॥
दू॒वन्न॑ इति द्रु – अ॒न्नः । सर्पि॑रा॒सुति॑रिति सर्पिः – आ॒सु॒तिः ।
प्र॒लः । हो॒ता ॥ व॒रे॒ण्यः ॥ स॒ह॒सः । पु॒त्रः । अ॒द्भु॒तः ॥ पर॒स्याः ।
अ॒धी॒ति । सँ॒वत॑ इति सं – वतः । अ॒व॒रान् । अ॒भि । ए॒ति । 36 (50)

TS 4.1.9.3

तर॑ ।

यत्रा॑हमस्मि ताँ॒ अव॑ ॥

पर॒म॒स्याः॑ परा॒वतो॑ रोहि॒दश्च॑ इ॒हाऽग॑हि ।

पु॒री॒ष्यः॑ पु॒रु॒प्रि॒यो॒ऽग्ने॒ त्वं॑ त॒रा मृ॒धः॑ ॥

सी॒द त्वं॑ मा॒तु॒र॒स्या॒ उप॒स्थे॒ वि॒श्वा॒न्य॒ग्ने॒ व॒यु॒ना॒नि वि॒द्वान्॑ ।

मै॒नाम॒र्चि॒षा मा॒ तप॑सा॒ऽभि शू॒शु॒चो॒ऽन्त॑र॒स्या॒ शु॒क्र ज्यो॑ति॒र्वि भा॑हि ॥

अ॒न्त॒र॒ग्ने रु॒चा त्व॑मु॒खायै॒ स॒द॒ने स्वे॒ ।

तस्या॒स्त्व॒ हर॑सा॒ तप॑न् () जा॒त॒वे॒दः शि॒वो भ॑व ॥

शि॒वो भू॒त्वा म॒ह्य॒म॒ग्ने॒ऽथो॑ सी॒द शि॒व॒स्त्वं ।

शि॒वाः कृ॒त्वा दि॒शः॒ सर्वाः॒ स्वां यो॑नि॒मि॒हा॒ऽऽस॑दः ॥ 37

TS 4.1.9.3 - Padam

त॒र ॥ य॒त्र । अ॒ह॒म् । अ॒स्मि॑ । तान् । अ॒व ॥ प॒र॒म॒स्याः॑ । प॒रा॒व॒त इति॑

प॒रा – व॒तः । रो॒हि॒दश्च॑ इति॑ रो॒हि॒त् – अ॒श्वः॑ । इ॒ह । ए॒ति । ग॒हि ॥

पु॒री॒ष्यः॑ । पु॒रु॒प्रि॒य इति॑ पु॒रु – प्रि॒यः॑ । अ॒ग्ने॑ । त्वम् । त॒र । मृ॒धः॑ ॥

सी॒द । त्वम् । मा॒तुः॑ । अ॒स्याः॑ । उ॒प॒स्थ इत्यु॑प – स्थे॒ । वि॒श्वा॒नि ।

अ॒ग्ने॑ । व॒यु॒ना॒नि । वि॒द्वान् ॥ मा॒ । ए॒ना॒म् । अ॒र्चि॒षा॑ । मा॒ । तप॑सा॒ ।

अ॒भी॒ति॑ । शू॒शु॒चः॑ । अ॒न्तः॑ । अ॒स्याम् । शु॒क्र॒ज्यो॒ति॒रि॒ति॑
शु॒क्र – ज्यो॒तिः॑ । वी॒ति॑ । भा॒हि ॥ अ॒न्तः॑ । अ॒ग्ने॑ । रु॒चा । त्वम् ।
उ॒खायै॑ ॥ स॒दने॑ । स्वे ॥ तस्याः॑ । त्वम् । ह॒रसा॑ । तप॒न् () ।
जा॒तवे॒द इति॑ जा॒त-वे॒दः॑ । शि॒वः॑ । भ॒व ॥ शि॒वः॑ । भू॒त्वा । म॒ह्यम् ॥
अ॒ग्ने॑ । अथो॒ इति॑ । सी॒द । शि॒वः॑ । त्वम् ॥ शि॒वाः॑ । कृ॒त्वा ।
दि॒शः॑ । सर्वाः॑ । स्वा॒म् । यो॒निम् ॥ इ॒ह । ए॒ति॑ । अ॒सदः॑ ॥ 37 (70)

(वी॒रय॒स्वा – ऽ – तप॒न् – वि॒श्रु॒तिश्च॑) (A9)

TS 4.1.10.1

यद॒ग्ने॑ या॒नि का॒नि चा॒ऽऽते॑ दा॒रूणि॑ द॒ध्मसि॑ ।
तद॒स्तु तु॒भ्यमि॒द्-घृ॒तं तज्जु॑षस्व यवि॒ष्ट्य ॥
यद॒त्युप॑जि॒ह्विका॑ यद्व॒म्रो अ॒तिस॑र्पति ।
सर्वं॑ तद॒स्तु ते घृ॒तं तज्जु॑षस्व यवि॒ष्ट्य ॥
रा॒त्रिꣳ रा॒त्रिम॑प्र॒यावं॑ भ॒रन्तो॑ऽश्वा॒येव॑ तिष्ठ॒ते घा॒सम॑स्मै ।
रा॒यस्पो॑षेण॒ समि॑षा म॒दन्तो॑ऽग्ने॒ मा ते॑ प्र॒तिवे॑शा रिषाम ॥
ना॒भा – [] 38

TS 4.1.10.1 - Padam

यत् । अ॒ग्ने । या॒नि । का॒नि । च । ए॒ति । ते । दा॒रू॒णि । द॒ध्म॒सि ॥
तत् । अ॒स्तु । तु॒भ्यम् । इत् । घृ॒तम् । तत् । जु॒ष॒स्व । य॒वि॒ष्ट्य ॥
यत् । अ॒त्ति । उ॒प॒जि॒ह्वि॒केत्यु॒प – जि॒ह्वि॒का । यत् । व॒म्रः ।
अ॒ति॒स॒र्प॒तीत्य॑ति-स॒र्प॒ति ॥ स॒र्वम् । तत् । अ॒स्तु । ते । घृ॒तम् । तत् ।
जु॒ष॒स्व । य॒वि॒ष्ट्य ॥ रा॒त्रि॒रा॒त्रि॒मि॒ति रा॒त्रिम् – रा॒त्रिम् ।
अ॒प्र॒या॒व॒मि॒त्यप्र॑-या॒वम् । भ॒र॒न्तः । अ॒श्वा॒य । इ॒व । ति॒ष्ठ॒ते । घा॒सम् ।
अ॒स्मै ॥ रा॒यः । पो॒षे॒ण । स॒मि॒ति । इ॒षा । म॒द॒न्तः । अ॒ग्ने । मा । ते ।
प्र॒ति॒वे॒शा इति॑ प्र॒ति – वे॒शाः । रि॒षाम् ॥ ना॒भा । 38 (50)

TS 4.1.10.2

पृ॒थि॒व्याः स॒मि॒धा-न॒म॒ग्नि॒रा॒य॒स्यो॒षाय॑ बृ॒ह॒ते ह॒वाम॑हे ।
इ॒र॒म्म॒दं बृ॒ह॒दु॒क्थं य॑ज॒त्रं जे॒तार॑म॒ग्निं पृ॒त॒ना॒सु सा॒स॒हिं ॥
याः से॒ना अ॒भी॒त्वरि॑रा-व्या॒धि॒नी-रु॒ग॒णा उ॒त ।
ये स्ते॒ना ये च त॑स्करा॒स्तास्ते॑ अ॒ग्नेऽपि॑ द॒धाम्या॑स्यै ॥
द॒ष्ट्राभ्यां॑ म॒लि॒म्लून् जं॒भ्यै-स्त॑स्करा॒स्ते उ॒त ।

हनू॑भ्या॒ ऽ स्ते॒नान्-भ॒गव॒स्ता॒-स्त्वं॑ खा॒द सु॒खादि॑तान् ॥

ये जने॑षु म॒लि॒म्लवः॑ स्ते॒नास॑-स्त॒स्करा॑ वने॑ ।

ये – [] 39

TS 4.1.10.2 - Padam

पृ॒थि॒व्याः । स॒मि॒धा॒नमि॑ति सं-इ॒धा॒नम् । अ॒ग्नि॒म् । रा॒यः ।

पोषा॑य । बृ॒हते॑ । ह॒वाम॑हे ॥ इ॒रं॒मद॑मिती॒रं – म॒दम् । बृ॒हदु॑क्थमि॒ति

बृ॒हत् – उ॒क्थ॒म् । यज॑त्रम् । जे॒तार॑म् । अ॒ग्नि॒म् । पृ॒तना॑सु ।

सा॒सहि॑म् ॥ याः । से॒नाः । अ॒भी॒त्वं॒रीरि॑त्य॒भि – इ॒त्वं॒रीः ।

आ॒व्या॒धि॒नीरि॑त्या – व्या॒धि॒नीः । उ॒गणाः॑ । उ॒त ॥ ये । स्ते॒नाः । ये ।

च । त॒स्कराः॑ । ता॒न् । ते । अ॒ग्ने । अ॒पी॒ति । द॒धा॒मि । आ॒स्ये॑ ॥

द॒ष्ट्रा॒भ्याम् । म॒लि॒म्लून् । जं॒भ्यैः॑ । त॒स्करा॑न् । उ॒त ॥ हनू॑भ्यामि॒ति

हनु॑ – भ्या॒म् । स्ते॒नान् । भ॒गव॑ इति भ॒ग – वः॑ । ता॒न् । त्वम् ।

खा॒द । सु॒खादि॑तानि॒ति सु – खा॑दि॒तान् ॥ ये । जने॑षु । म॒लि॒म्लवः॑ ।

स्ते॒नासः॑ । त॒स्कराः॑ । वने॑ ॥ ये । 39 (50)

TS 4.1.10.3

कक्षे॑ष्व॒घा॒ यव॑स्ता॒ऽस्ते॑ द॒धामि॑ जं॒भयोः॑ ॥
यो अ॒स्मभ्य॑मरातीयाद्-यश्च॑ नो॒ द्वेष॑ते॒ जनः॑ ।
निन्दा॑द्यो अ॒स्मान् दि॒प्साच्च॑ सर्वं॑ तं म॒स्मसा॑ कुरु ॥
सञ्शितं॑ मे॒ ब्रह्म॑ सञ्शितं॑ वी॒र्यं॑ बलं॑ ।
सञ्शितं॑ क्ष॒त्रं जि॒ष्णु॒ यस्या॒ऽहमस्मि॑ पु॒रोहि॑तः ॥
उदे॑षां बा॒हू अति॑रमु॒द्वर्च॑ उ॒दू बलं॑ ।
क्षि॒णोमि॑ ब्रह्म॒णा-ऽमि॒त्रानु॑न्नयामि - [] 40

TS 4.1.10.3 - Padam

कक्षे॑षु । अ॒घाय॑व इत्य॒घ - यवः॑ । तान् । ते । द॒धामि॑ । जं॒भयोः॑ ॥
यः । अ॒स्मभ्य॑मित्य॒स्म-भ्यम् । अ॒राती॑यात् । यः । च । नः । द्वेष॑ते ।
जनः॑ ॥ निन्दा॑त् । यः । अ॒स्मान् । दि॒प्सात् । च । सर्व॑म् । तम् ।
म॒स्मसा॑ । कुरु ॥ सञ्शित॑मिति सं - शितम् । मे । ब्रह्म॑ ।
सञ्शित॑मिति सं - शितम् । वी॒र्यम् । बलम् ॥
सञ्शित॑मिति सं - शितम् । क्ष॒त्रम् । जि॒ष्णु॒ । यस्य॑ । अ॒हम् ।

अस्मि॑ । पु॒रोहि॑त इति॑ पु॒रः – हि॒तः ॥ उ॒दि॒ति । ए॒षाम् । बा॒हू इति॑ ।
अ॒ति॒रम् । उ॒दि॒ति । वर्चः॑ । उ॒दि॒ति । उ॒ । ब॒लम् ॥ क्षि॒णोमि॑ ।
ब्र॒ह्म॒णा । अ॒मि॒त्रान् । उ॒दि॒ति । न॒यामि॑ । 40 (50)

TS 4.1.10.4

स्वा॒ँ अ॒हं ॥

दृ॒शा॒नो रु॒क्म उ॒र्व्या व्य॑द्यौ॒र्दुर्म॑र्ष॒मायुः॑ श्रि॒ये रु॒चा॒नः ।
अ॒ग्नि॒रमृ॑तो॒ अभ॑व॒द्वयो॑-भि॒र्यदे॑नं॒ द्यौर॑ज॒नय॑त् सु॒रेताः॑ ॥
वि॒श्वा रू॒पाणि॑ प्र॒ति मु॒ञ्च॑ते क॒विः प्रा॒ऽसा॑वी॒द्भ॒द्रं द्वि॒पदे॑ च॒तु॒ष्पदे॑ ।
वि ना॑क॒मख्य॑त् स॒वि॒ता व॒रेण्यो॑ऽनु प्र॒याण॑मु॒षसो॑ वि॒राज॑ति ॥
न॒क्तोषा॑सा॒ सम॑न॒सा वि॒रूपे॑ धा॒पये॑ते शि॒शुमे॑क॒ँ समी॑ची ।
द्या॒वा क्षा॒मा रु॒क्मो – [] 41

TS 4.1.10.4 - Padam

स्वा॒न् । अ॒हम् ॥ दृ॒शा॒नः । रु॒क्मः । उ॒र्व्या । वी॒ति । अ॒द्यौत् ।
दु॒र्म॑र्ष॒मिति॑ दुः – म॒र्षम् । आ॒युः । श्रि॒ये । रु॒चा॒नः ॥ अ॒ग्निः ।
अ॒मृ॒तः । अ॒भ॒वत् । वयो॑भि॒रिति॑ वयः॑ – भिः॑ । यत् । ए॒नम् । द्यौः ।

अ॒जन॑यत् । सु॒रेता॑ इति॒ सु – रेताः॑ ॥ वि॒श्वा॑ । रू॒पाणि॑ । प्र॒तीति॑ ।
मु॒ञ्च॑ते । क॒विः । प्रेति॑ । अ॒सा॒वीत् । भ॒द्रम् । द्वि॒पद॑ इति॒ द्वि-पदे॑ ।
चतु॑ष्पद॒ इति॒ चतुः॑ – प॒दे ॥ वी॒ति । ना॒कम् । अ॒ख्य॑त् । स॒विता॑ ।
वरे॑ण्यः । अ॒न्वि॒ति । प्र॒याण॑मिति॒ प्र – या॒नम् । उ॒षसः॑ । वी॒ति ।
रा॒ज॒ति ॥ न॒क्तो॒षासा॑ । स॒मन॑सेति॒ स – म॒नसा॑ । वि॒रूपे॑ इति॒
वि-रूपे॑ । धा॒पये॑ते इति॒ । शि॒शुम् । ए॒कम् । स॒मी॒ची इति॑ ॥ द्या॒वा ।
क्षाम॑ । रु॒क्मः । 41 (50)

TS 4.1.10.5

अ॒न्तर्वि॑ भाति॒ दे॒वा अ॒ग्निं धा॑रयन् द्र॒वि॒णो॒दाः ॥
सु॒प॒र्णो॑ऽसि ग॒रु॒त्मा॑न् त्रि॒वृत्ते॑ शि॒रो गाय॑त्रं चक्षुः॒ स्तोम॑ आ॒त्मा
सा॒म ते त॒नू॒र्वाम॑दे॒व्यं बृ॒हद्-रथ॑न्तरे पक्षौ य॒ज्ञाय॑ज्ञि॒यं पु॒च्छं
छन्दा॑स्य॒ङ्गानि॑ धि॒ष्णि॒याः श॒फा यजू॑षि॒ नाम ॥
सु॒प॒र्णो॑ऽसि ग॒रु॒त्मा॑न् दि॒वं ग॒च्छ सु॒वः प॒त ॥ 42

TS 4.1.10.5 - Padam

अ॒न्तः । वी॒ति॑ । भा॒ति॑ । दे॒वाः । अ॒ग्नि॑म् । धा॒रय॑न् । द्र॒वि॒णो॒दा
इति॑ द्र॒वि॒णः – दाः ॥ सु॒पर्ण॑ इति॑ सु – पर्णः । अ॒सि॑ । ग॒रु॒त्मा॑न् ।
त्रि॒वृ॒दि॒ति॑ त्रि – वृ॒त् । ते । शि॒रः । गा॒य॒त्र॒म् । चक्षुः॑ । स्तो॒मः ।
आ॒त्मा । सा॒म । ते । त॒नूः । वा॒म॒दे॒व्य॒मि॒ति॑ वा॒म – दे॒व्य॒म् ।
बृ॒ह॒द्र॒थ॒न्त॒रे॑ इति॑ बृ॒ह॒त् – र॒थ॒न्त॒रे॑ । पक्षौ॑ । य॒ज्ञा॒य॒ज्ञि॒य॒म् । पु॒च्छ॒म् ॥
छ॒न्दा॒ँसि॑ । अ॒ङ्गा॒नि॑ । धि॒ष्णि॒याः । श॒फाः । यजू॒ँषि॑ । ना॒म ॥
सु॒पर्ण॑ इति॑ सु – पर्णः । अ॒सि॑ । ग॒रु॒त्मा॑न् । दि॒व॒म् । ग॒च्छ॒ ।
सु॒वः । प॒त ॥ 42 (38) (ना॒भा – व॒ने॒ ये – न॑या॒मि – क्षा॒मा॑ रु॒क्मा॑
– ऽष्टा॒त्रि॒ँश॒च्च॑) (A10)

TS 4.1.11.1

अ॒ग्ने॒ यं य॑ज्ञ॒म॒ध्व॒रं वि॑श्व॒तः॑ प॒रि॒भूर॑सि ।
स इ॒द्दे॒वेषु॑ ग॒च्छ॒ति ॥
सो॒म या॑स्ते॒ मयो॑भुव॒ ऊ॒त॒यः॑ स॒न्ति॑ दा॒शु॒षे ॥
ता॒भि॒र्नो॑ऽवि॒ता भ॑व ॥

अ॒ग्नि॒र्मूर्धा॑ भुवः ॥

त्व॒न्नः॑ सोम॒ या ते॑ धा॒मानि॑ ॥

तथ् स॒वि॒तुर्व॑रेण्यं॑ भ॒र्गो दे॒वस्य॑ धीमहि ।

धि॒यो यो नः॑ प्र॒चोद॑यात् ॥

अ॒चि॒त्ती य॑च्च॒कृ॒मा दै॒व्ये ज॑ने॒ दी॒नैर्दक्षैः॑ प्र॒भू॒ती पू॒रुष॑त्वता ॥ 43

TS 4.1.11.1 - Padam

अ॒ग्ने॑ । य॒म् । य॒ज्ञ॒म् । अ॒ध्व॒र॒म् । वि॒श्व॒तः॑ । प॒रि॒भू॒रि॒ति॑ प॒रि – भूः॑ ।

अ॒सि॑ ॥ सः॑ । इ॒त् । दे॒वेषु॑ । ग॒च्छ॒ति॑ ॥ सोम॑ । याः॑ । ते॑ । म॒यो॒भुव॑

इ॒ति॑ म॒यः – भुवः॑ । ऊ॒त॒यः॑ । स॒न्ति॑ । दा॒शु॒षे॑ ॥ ता॒भिः॑ । नः॑ ।

अ॒वि॒ता । भ॒व ॥ अ॒ग्निः॑ । मूर्धा॑ । भुवः॑ ॥ त्व॒म् । नः॑ । सोम॑ ।

या । ते॑ । धा॒मानि॑ ॥ तत् । स॒वि॒तुः॑ । व॑रेण्यम् । भ॒र्गः॑ । दे॒वस्य॑ ।

धी॒म॒हि ॥ धि॒यः॑ । यः॑ । नः॑ । प्र॒चो॒द॒या॒दि॒ति॑ प्र॒चो॒द॒या॒त् ॥ अ॒चि॒त्ती॑ ।

यत् । च॒कृ॒म । दै॒व्ये॑ । ज॑ने॒ दी॒नैः॑ । दक्षैः॑ । प्र॒भू॒तीति॑ प्र – भू॒ती॑ ।

पू॒रुष॑त्वतेति॑ पू॒रुष॑ – त्व॒ता ॥ 43 (50)

TS 4.1.11.2

दे॒वेषु॑ च स॒वित॑र्मा॒नुषे॑षु च त्व॒न्नो अ॒त्र सु॒वता॑द॒नाग॑सः ॥
चो॒दयि॑त्री सू॒नृता॑नां चे॒तन्ती॑ सु॒मती॑नां ।
य॒ज्ञं द॑धे सर॒स्वती॑ ॥
पा॒वीर॑वी क॒न्या चि॒त्रायुः॑ सर॒स्वती॑ वी॒रप॑त्नी धि॒यं धा॑त् ।
ग॒नाभि॑रच्छि॒द्रं श॒रणं स॒जोषा॑ दु॒राध॑र॒षं गृ॑णते श॒र्म य॑स॒त् ॥
पू॒षा गा अ॒न्वेतु॑ नः पू॒षा र॑क्ष॒त्वर्व॑तः ।
पू॒षा वाज॑स॒नोतु॑ नः ॥
शु॒क्रं ते अ॒न्यद्य॑ज॒तं ते अ॒न्य - [] 44

TS 4.1.11.2 - Padam

दे॒वेषु॑ । च । स॒वि॒तः । मा॒नु॒षे॒षु । च । त्व॒म् । नः । अ॒त्र । सु॒व॒ता॒त् ।
अ॒ना॒ग॒सः ॥ चो॒द॒यि॒त्री । सू॒नृ॒ता॒ना॒म् । चे॒त॒न्ती॑ । सु॒म॒ती॒ना॒मि॒ति॑
सु - म॒ती॒ना॒म् ॥ य॒ज्ञ॒म् । द॑धे । सर॒स्व॒ती ॥ पा॒वी॒र॒वी । क॒न्या॑ ।
चि॒त्रा॒यु॒रि॒ति॑ चि॒त्र - आ॒युः । सर॒स्व॒ती । वी॒र॒प॒त्नी॑ति॒ वी॒र - प॒त्नी॑ ।
॥ धि॒य॒म् । धा॑त् ॥ ग॒ना॒भिः । अ॒च्छि॒द्र॒म् । श॒रण॒म् ।

स॒जोषा॑ इति॑ स-जोषाः॑ । दु॒राध॑र्षमि॒ति दुः॑ – आ॒धर्ष॑म् । गृ॒णते॑ ।
श॒र्म । य॒ञ्स॑त् ॥ पू॒षा । गाः॑ । अ॒न्वि॒ति । ए॒तु । नः॑ । पू॒षा । र॒क्षतु॑ ।
अ॒र्वतः॑ ॥ पू॒षा । वा॒जम् । स॒नोतु॑ । नः॑ ॥ शु॒क्रम् । ते॑ । अ॒न्यत् ।
य॒जत॑म् । ते॑ । अ॒न्यत् । 44 (50)

TS 4.1.11.3

–द्वि॒षुरूपे॑ अ॒हनी॑ द्यौ॒रिवा॑सि ।

वि॒श्वा हि॑ मा॒या अ॒वसि॑ स्व॒धावो॑ भ॒द्रा ते॑ पू॒षन्नि॒ह रा॒तिर॑स्तु ॥
ते॒ऽव॒र्धन्त॑ स्व॒तव॑सो म॒हित्व॒ना ऽऽना॑कं त॒स्थुरु॑रु च॒क्रिरे॑ स॒दः ।
वि॒ष्णु र्य॑द्वाऽऽव॒द्-वृ॑षणं म॒दच्यु॑तं व॒यो न॑ सी॒दन्न॑धि ब॒र्हिषि॑ प्रि॒ये ॥
प्र॒चित्र॑म॒र्कं गृ॒णते॑ तु॒राय॑ मा॒रुता॑य स्व॒तव॑से भ॒रद॑ध्वं ।
ये स॒हाञ्सि॑ स॒हसा॑ स॒हन्ते॑ – [] 45

TS 4.1.11.3 - Padam

वि॒षुरूपे॑ इति॑ वि॒षु – रू॒पे । अ॒हनी॑ इति॑ । द्यौः॑ । इ॒व । अ॒सि ॥
वि॒श्वाः॑ । हि॑ । मा॒याः । अ॒वसि॑ । स्व॒धाव॑ इति॑ स्व॒धा – वः॑ । भ॒द्रा ।

ते । पू॒षन् । इ॒ह । रा॒तिः । अ॒स्तु ॥ ते । अ॒व॒र्द्ध॒न्त । स्व॒त॒व॒स॒ इति॑
स्व – त॒व॒सः । म॒हि॒त्व॒नेति॑ म॒हि – त्व॒ना । ए॒ति । ना॒कम् । त॒स्थुः ।
उ॒रु । च॒क्रि॒रे । स॒दः ॥ वि॒ष्णुः । य॒त् । ह । आ॒व॒त् । वृ॒षण॑म् ।
म॒द॒च्यु॒त॒मि॒ति॑ म॒द – च्यु॒तम् । व॒यः । न । सी॒दन् । अ॒धी॒ति ।
ब॒र्हि॒षि । प्रि॒ये ॥ प्रे॒ति । चि॒त्रम् । अ॒र्कम् । गृ॒ण॒ते । तु॒राय॑ ।
मा॒रु॒ताय॑ । स्व॒त॒व॒स॒ इति॑ स्व – त॒व॒से । भ॒र॒द्ध्वम् ॥
ये । स॒हा॒सि॑ । स॒ह॒सा । स॒ह॒न्ते । 45 (50)

TS 4.1.11.4

रे॒ज॒ते॑ अ॒ग्ने॒ पृ॒थि॒वी म॒खे॒भ्यः ॥
वि॒श्वे॑ दे॒वा वि॒श्वे॑ दे॒वाः ॥
द्या॒वा नः॑ पृ॒थि॒वी इ॒म॒सि॑ द्र॒म॒द्य दि॒वि॒स्पृ॒शं ॥
य॒ज्ञं दे॒वेषु॑ य॒च्छ॒तां ॥
प्र॒ पूर्॒व॒जे॒ पि॒तरा॑ न॒व्य॒सी॒भिर्गी॒र्भिः॑ कृ॒णु॑द्ध्व॒स॒द॒ने ऋ॒त॒स्य॑ ।
आ नो॑ द्या॒वापृ॒थि॒वी दै॒व्ये॒न ज॒ने॒न या॒तं म॒हि वां॑ व॒रू॒थं ॥
अ॒ग्नि॒स्तो॒मे॒न बो॒ध॒य॒ समि॒धानो॑ अ॒म॒र्त्यं ।

ह॒व्या दे॒वेषु॑ नो दधत् ॥

स ह॒व्य॒वाड॑म॒र्त्य उ॒शिग्दू॑तश्चनो॒हितः () ।

अ॒ग्निर्दि॒र्धया॑ समृ॒ण्वति ॥

श॒न्नो भव॑न्तु वा॒जेवा॑जे ॥ 46

TS 4.1.11.4 - Padam

रे॒जते॑ । अ॒ग्ने । पृ॒थि॒वी । म॒खेभ्यः॑ ॥ वि॒श्वे॑ । दे॒वाः । वि॒श्वे॑ । दे॒वाः ॥

द्या॒वा॑ । नः॑ । पृ॒थि॒वी इति॑ । इ॒मम् । सि॒द्धम् । अ॒द्य ।

दि॒विस्पर्श॑मिति दि॒वि – स्पर्श॑म् ॥ य॒ज्ञम् । दे॒वेषु॑ । य॒च्छता॑म् ॥

प्रेति॑ । पू॒र्व॒जे इति॑ पू॒र्व-जे॑ । पि॒तरा॑ । न॒व्यसी॑भिः । गी॒र्भिः ।

कृ॒णु॒ध्वम् । स॒दने॑ इति॑ । ऋ॒तस्य॑ ॥ ए॒ति । नः॑ । द्या॒वापृ॒थि॒वी इति॑

द्या॒वा-पृ॒थि॒वी । दै॒व्येन॑ । ज॒नेन॑ । या॒तम् । म॒हि । वा॒म् । व॒रूथ॑म् ॥

अ॒ग्निम् । स्तो॒मेन॑ । बो॒धय॑ । स॒मि॒धान॑ इति॑ सं – इ॒धानः॑ ।

अ॒म॒र्त्यम् ॥ ह॒व्या । दे॒वेषु॑ । नः॑ । द॒धत् ॥ सः॑ । ह॒व्य॒वाडि॑ति

ह॒व्य – वाट् । अ॒म॒र्त्यः । उ॒शिक् । दू॒तः । च॒नो॒हितः () ॥ अ॒ग्निः ।

पद पाठे (वाक्य सहित) – चतुर्थकाण्डे – प्रथमः प्रश्नः

धिया॑ । समि॑ति । ऋ॒ण्व॒ति ॥ श॒म् । नः॑ । भ॒व॒न्तु । वा॒जे॒वा॒ज इति॑
वा॒जे – वा॒जे ॥ 46 (58) (पु॒रु॒ष॒त्व॒ता – य॒ज॒त॒न्ते अ॒न्य॒थ – स॒ह॒न्ते
– च॒नो॑हि॒तो – ऽष्टौ॑ च) (A11)

PraSna Korvai with starting Padams of 1 to 11 Anuvaakams :-

(यु॒ञ्जान॑ – इ॒मा॒म॒गृ॒भ्णन् – दे॒व॒स्य – स॒न्ते – वि पा॒ज॒सा –
व॒स॒व॒स्त्वा – स॒मा॒स्त्वो – द्ध॒र्वा – अ॒स्या॒कू॒तिं – य॑द॒ग्ने या॒न् –
य॒ग्ने यं य॑ज्ञ – मे॒का॒द॒श)

Korvai with starting Padams of 1, 11, 21 Series of Panchaatis :-

(यु॒ञ्जानो॑ – वर्म॑ च स्थ – आ॒दि॒त्य॒स्त्वा – भा॒रती॑ – स्वा॒ङ् अ॒ह॒ङ्
– षट्च॑त्वारि॒ङ्शत्)

First and Last Padam of First Prasnam of Kandam 4 :-

(यु॒ञ्जानो॑ – वा॒जे॒वा॒जे)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां पद पाठे

चतुर्थ काण्डे प्रथमः प्रश्नः समाप्तः ॥

पद पाठे (वाक्य सहित) – चतुर्थकाण्डे – प्रथमः प्रश्नः

Details of Panchati and Padam for Kandam 4 , Prasanam 1 – (TS 4.1)

	Panchati	Padams
Anuvakam 1	4	203
Anuvakam 2	5	270
Anuvakam 3	4	177
Anuvakam 4	4	186
Anuvakam 5	4	204
Anuvakam 6	3	169
Anuvakam 7	4	184
Anuvakam 8	6	284
Anuvakam 9	3	170
Anuvakam 10	5	238
Anuvakam 11	4	208
Total →	46	2293

Notes:

- Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
- Please download our vedic compilations from our web site www.vedavms.in